

MESYUARAT KETIGA, PENGGAJAL KETIGA  
PARLIMEN KEEMPAT BELAS  
2020

**HARI ISNIN : 16 NOVEMBER 2020**

**JAWAPAN-JAWAPAN BAGI PERTANYAAN-PERTANYAAN JAWAB**  
**LISAN YANG TIDAK DIJAWAB DI DALAM DEWAN**  
**( SOALAN NO. 11 HINGGA NO. 55 )**

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' HAJI JALALUDDIN BIN HAJI ALIAS  
[JELEBU]**

**TARIKH : 16 NOVEMBER 2020 (ISNIN)**

**SOALAN**

**DATO' HAJI JALALUDDIN BIN HAJI ALIAS [ JELEBU ]** minta **MENTERI KEWANGAN** menyatakan berapa jumlah sesi konsultasi yang telah dibuat dalam menyediakan Belanjawan 2021 dan siapakah pihak-pihak yang telah dilibatkan.

**JAWAPAN**

**Tuan Yang di-Pertua,**

Untuk makluman, beberapa sesi libat urus dan konsultasi telah dilaksanakan sepanjang berlangsungnya proses perolehan input bagi Belanjawan 2021. Sesi Konsultasi Belanjawan 2021 ini telah melibatkan 13 Negeri di seluruh Malaysia dan 33 Kumpulan Fokus secara keseluruhannya bagi memastikan cadangan Belanjawan 2021 dapat dirangka secara holistik. Sehingga kini, libat urus Belanjawan 2021 telah melibatkan beberapa industri seperti industri Perusahaan Kecil Sederhana (PKS), pelancongan, peranti perubatan, komoditi, infrastruktur awam, pendidikan, Industry Minyak dan Gas (*Oil&Gas*), Elektrikal dan Elektronik (*E&E*), alam sekitar, alatan perubatan & farmaseutikal, serta industri-industri berkaitan kesenian dan kebudayaan.

Kementerian Kewangan juga turut mengambil kira pandangan dan idea-idea dari agensi di sektor swasta melalui memorandum yang dihantar oleh pemain industri, persatuan dan NGO bagi memastikan pandangan semua pihak diambil kira. Di samping itu, input daripada rakyat juga dikumpulkan melalui portal cadangan Kementerian Kewangan bagi memastikan langkah-langkah Belanjawan 2021 merangkumi semua pihak terutamanya bagi yang terjejas akibat COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB NOR AZRINA BINTI SURIP [MERBOK]**

**TARIKH : 16 NOVEMBER 2020 (ISNIN)**

**SOALAN**

**PUAN NOR AZRINA BINTI SURIP [MERBOK]** minta **MENTERI KOMUNIKASI DAN MULTIMEDIA** menyatakan sejauh manakah pakej rangsangan ekonomi sebanyak RM25 juta diperuntukkan melalui MDEC bagi program Global Online Workforce (GLOW) dalam meningkatkan keupayaan ekonomi gig ini benar-benar sampai kepada sasaran.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Program Tenaga Kerja Dalam Talian Global atau *Global Online Workforce* (GLOW) bermula sebagai satu komponen Program eRezeki di bawah RMKe-11 dan telah dilaksanakan sejak tahun 2017, dengan matlamat untuk memperkenalkan peluang kerjaya sebagai pekerja bebas digital (*digital freelancer*) yang mampu menjana pendapatan bernilai tinggi secara dalam talian (*online*).

Menerusi GLOW, peserta akan diberikan pendedahan, diprofilkan mengikut kemahiran, dan seterusnya menjalani sesi latihan dan bimbingan selama tiga (3) bulan supaya mereka mampu mengenalpasti, membuat bidaan dan memperoleh tugas yang ada di pelbagai platform dalam talian.

Dengan pengumuman peruntukan dana khas sebanyak RM25 juta oleh YAB Perdana Menteri kepada Program GLOW di bawah PENJANA, usaha Program GLOW-PENJANA difokuskan khusus kepada membantu golongan graduan yang menganggur dan para pekerja dalam sektor ekonomi tertentu yang terjejas teruk akibat penularan wabak COVID-19 baru-baru ini.

Program GLOW-PENJANA telah dibuka untuk pendaftaran sejak 20 Ogos 2020. Sehingga 6 November 2020, seramai 5,670 orang peserta telah mendaftar untuk menjalani latihan. Daripada jumlah yang berdaftar, seramai 4,294 peserta telah menjalani latihan intensif dan kini sedang memulakan sesi *mentoring* selama tiga (3) bulan di bawah bimbingan dan seliaan *freelancer* berpengalaman. Berikut adalah pecahan peserta yang menjalani latihan dan bimbingan di bawah program GLOW:

- a. Pekerja yang pendapatan bulanan dipotong melebihi 50% (*salary cut*) – 10.2%;
- b. Graduan menganggur (*unemployed graduates*) – 58.2%; dan
- c. Pekerja yang telah diberhentikan (*retrenched workers*) – 31.6%.

Pendaftaran dan latihan bagi program GLOW-PENJANA akan dijalankan sehingga 31 Disember 2020. Program GLOW-PENJANA mensasarkan penyertaan seramai 10,000 orang daripada golongan yang terkesan. Untuk menarik penyertaan golongan sasar, MDEC menjalankan kerjasama strategik dengan :

- a. Kementerian Sumber Manusia, khususnya Pertubuhan Keselamatan Sosial (PERKESO) dan Jabatan Tenaga Kerja;
- b. Kementerian Belia dan Sukan;
- c. Kumpulan Wang Simpanan Pekerja (KWSP)
- d. Agensi Kaunseling dan Pengurusan Kredit (AKPK); dan
- e. Perbadanan Tabung Pendidikan Tinggi Nasional (PTPTN).

Selain itu, MDEC juga sedang merangka kerjasama dengan syarikat-syarikat yang terkesan. Ini termasuklah syarikat penerbangan seperti Malaysia Airlines (MAS), Air Asia dan Malindo Air, untuk memperluaskan promosi program kepada pekerja-pekerja yang terkesan atau terlibat dalam program penstrukturan semula syarikat berkaitan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HAJI MOHD. SALIM SHARIF  
[ JEMPOL ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI SAINS, TEKNOLOGI DAN INOVASI** menyatakan perancangan masa hadapan berkaitan pembangunan satelit bagi tujuan keselamatan dan kedaulatan negara, memandangkan Malaysia masih belum mengoperasikan satelit sendiri pada masa ini.

**JAWAPAN**

**Tuan Yang di-Pertua,**

**Untuk makluman Ahli Yang Berhormat,**

1. Penggunaan satelit dalam mempertingkatkan dan memperkukuh sistem pertahanan negara adalah amat penting. Keupayaan satelit *remote sensing* yang dapat membekalkan imej terkini maklumat dan aktiviti di permukaan bumi secara berterusan bagi kawasan sasaran penting dan sensitif membolehkan aktiviti pemantauan, peninjauan dan risikan (*reconnaissance*) yang lebih berkesan. Secara langsung, ini dapat memastikan tindakan seperti pencegahan dan penguatkuasaan oleh pihak berkuasa dapat dilaksanakan secara lebih menyeluruh termasuk pencegahan pencerobohan pesisir pantai, sempadan, kawasan sasaran penting negara seperti kem tentera dan pusat risikan serta kawasan sensitif alam sekitar.

2. Selaras dengan Teras 2 di bawah Dasar Angkasa Negara 2030 (DAN2030) iaitu Menumpukan kepada Teknologi, Infrastruktur dan Aplikasi Angkasa yang Signifikan kepada Negara, Kementerian Sains, Teknologi dan Inovasi (MOSTI) melalui Agensi Angkasa Malaysia (MYSA) akan meneruskan kesinambungan Program Pembangunan Satelit Penderiaan Jauh Negara (PSPJN) bagi tujuan keselamatan, ketenteraman awam, pertahanan, perisikan dan kedaulatan negara serta kelestarian pembangunan negara. Selain itu, sektor angkasa negara disasarkan dapat menyumbang sekurang-kurangnya 0.3% kepada Keluaran Dalam Negara Kasar (KDNK) iaitu bersamaan RM3.2 bilion dan mewujudkan sehingga 5000 peluang pekerjaan baharu menjelang tahun 2030. Mesyuarat Jemaah Menteri pada 14 Ogos 2019 telah meluluskan Program PSPJN yang akan dilaksanakan secara *Request For Proposal* (RFP), dibuka kepada industri melalui *Private Public Partnership* (PPP) dengan tahap penglibatan *local content* yang optimum.

3. Program PSPJN adalah kesinambungan usaha Kerajaan dalam memastikan keupayaan dan kapasiti negara dalam bidang teknologi angkasa terus diperkasa termasuk meningkatkan sumber kepakaran tempatan. Program ini juga membuka peluang yang lebih luas kepada inisiatif kerjasama strategik di antara Kerajaan dengan pihak industri tempatan bagi memperkukuh ekosistem sektor angkasa agar lebih berdaya saing, kondusif bagi meneroka *space economy* dan mengurangkan kebergantungan negara terhadap pihak luar selain dapat memperkasakan dan memperkukuhkan keupayaan untuk berdikari (*self reliant*) dalam pembangunan satelit dan teknologi angkasa. Dokumen RFP dijangka akan ditawarkan kepada pihak industri selewatnya-lewatnya pada suku pertama tahun 2021 dan pelancaran satelit dijangka pada tahun 2024.

4. Program PSPJN adalah sebahagian daripada *roadmap Blueprint Malaysia Space Exploration 2030* (Malaysia Space-X 2030) yang dirangka MOSTI melalui MYSA bagi mencapai matlamat membangunkan keupayaan dan kemampuan untuk berdikari (*self reliant*) dalam pembangunan satelit dan teknologi angkasa dan dalam masa yang sama mengurangkan kebergantungan negara kepada pihak luar. *Blueprint* ini bertujuan mewujudkan ekosistem sektor angkasa negara yang



komprehensif, jangka masa panjang, melibatkan pembangun dan penggunaan teknologi angkasa yang terdiri daripada pelbagai agensi kerajaan, pihak industri dan akademik bagi menjamin akses kepada keupayaan angkasa (*space capability*) dan menjadikan Malaysia sebuah negara maju berpendapatan tinggi. Selain PSPJN, *Blueprint* Malaysia Space-X 2030 turut merangkumi program dan inisiatif lain seperti Program Ekonomi Angkasa, Program Pembangunan Pelancar Berjarak Dekat, Program Penyelidikan, Pembangunan, Pengkomersialan dan Inovasi (R,D,C&I) Sektor Angkasa, Program Global Navigation Satelit System (GNSS), dan Pemerkasaan Fasiliti Pemasangan, Integrasi dan Pengujian Satelit (AIT).

**Tuan Yang di-Pertua,**

5. *Blueprint* Malaysia Space-X 2030 khususnya Program PSPJN yang diterajui MOSTI melalui MYSA dengan penglibatan pelbagai agensi kerajaan dan pihak industri serta akademik akan dapat memperkukuhkan ekosistem sektor angkasa negara agar lebih berdaya saing dan kondusif serta dapat membangunkan keupayaan tempatan dalam membangun dan mengoperasi satelit sendiri bagi tujuan keselamatan, ketenteraman awam, pertahanan, perisikan dan kedaulatan negara serta kelestarian pembangunan dan pengurusan sumber negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG LING BIU [ SARIKEI ]**

**TARIKH : 16 NOVEMBER 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan berapa peratuskah penurunan penjualan harta tanah semasa pandemik wabak COVID-19 ini. Berapa banyak penurunan yang akan dijangka pada tahun depan.

**JAWAPAN**

**Tuan Yang di-Pertua,**

1. Untuk makluman Yang Berhormat, berdasarkan Laporan Pasaran Hartanah Separuh Tahun Pertama 2020 oleh Pusat Maklumat Harta Tanah Negara (NAPIC), prestasi pasaran harta tanah secara keseluruhan mencatatkan penurunan mendadak pada separuh tahun pertama 2020 (H1 2020) berbanding dengan tempoh yang sama tahun lalu (H1 2019). Terdapat sebanyak 75,318 transaksi harta tanah kediaman bernilai RM25.61 bilion yang dicatatkan dalam tempoh H1 2020 iaitu menurun 24.6% dalam bilangan (unit) dan 26.1% dalam nilai berbanding tempoh yang sama tahun lalu (H1 2019). Prestasi di semua negeri tidak memberangsangkan kerana semuanya mencatatkan penurunan dalam aktiviti pasaran.
2. Menurut laporan Bank Negara Malaysia (BNM), ekonomi Malaysia dijangka akan pulih secara beransur-ansur pada separuh tahun kedua 2020 (H2 2020) kerana sektor ekonomi telah dibuka semula secara berperingkat dan permintaan luar semakin bertambah baik. Dengan aktiviti ekonomi yang telah dimulakan semula sejak awal Mei 2020, aktiviti pasaran harta tanah yang dicatatkan pada bulan Mei dan Jun 2020 juga telah menyaksikan perubahan yang positif.
3. Walaupun terdapat peningkatan aktiviti pasaran dan langkah-langkah yang dicadangkan di bawah Pelan Jana Ekonomi Negara (PENJANA), pasaran harta tanah dijangka akan kekal perlahan pada separuh kedua tahun 2020 dan dijangka akan kekal perlahan sehingga tahun 2021. Tahap peningkatan akan bergantung kepada faktor domestik dan luaran seperti kestabilan politik, harga minyak dan komoditi global serta perkembangan pandemik COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' MOHD NIZAR BIN ZAKARIA  
[PARIT]**

**TARIKH : 16 NOVEMBER 2020 (ISNIN)**

**SOALAN**

**DATO' MOHD NIZAR BIN ZAKARIA [ PARIT ]** minta **MENTERI KEWANGAN** menyatakan :

- (a) status terkini pemulihan ekonomi negara sejak dilanda pandemik COVID-19; dan
- (b) sejauh manakah keberkesanan Pelan Jana Semula Ekonomi Negara (PENJANA) dan Pakej Rangsangan Ekonomi Prihatin Rakyat (PRIHATIN) membantu kearah kesejahteraan rakyat dan kemakmuran negara.

**JAWAPAN**

**Tuan Yang di-Pertua,**

1. Penularan pandemik COVID-19 bukan hanya memberi kesan kepada ekonomi negara, malahan kepada seluruh ekonomi dunia. Semua sektor utama ekonomi telah terjejas akibat penularan wabak ini. Ekonomi Malaysia mencatatkan penyusutan sebanyak 8.3 peratus pada separuh pertama 2020 berikutan pelaksanaan kawalan pergerakan bagi membendung penularan pandemik COVID-19. Walau bagaimanapun, pertumbuhan ekonomi negara pada separuh kedua 2020 ini dijangka lebih baik dan meningkat secara beransur-ansur berikutan pembukaan semula ekonomi secara berperingkat dan pelaksanaan beberapa pelan rangsangan ekonomi bagi menyokong rakyat dan perniagaan.

2. Sehubungan itu, beberapa petunjuk ekonomi negara memperlihatkan peningkatan melalui indikator bulan Ogos dan September. Alhamdulillah, prestasi ekonomi pada suku ketiga 2020 lebih baik berbanding suku kedua 2020. Pertumbuhan Keluaran Dalam Negeri Kasar (KDNK) suku tahun ketiga 2020 mencatat penyusutan lebih kecil sebanyak 2.7 peratus berbanding -17.1 peratus pada suku tahun kedua 2020. Dari sudut suku-ke-suku yang disesuaikan mengikut musim (seasonally-adjusted basis), ekonomi Malaysia telah pulih semula sebanyak 18.2 peratus (S2 2020: -16.5 peratus). Ini adalah selari dengan sektor ekonomi yang kembali beroperasi secara berperingkat sejak Mei lalu.

3. Kadar pengangguran juga telah berkurangan kepada 4.6 peratus pada September dari paras tertinggi 5.3 peratus pada Mei 2020. Antara indikator lain pemulihan ekonomi termasuk:

- a) Eksport negara berkembang kukuh kepada 13.6 peratus pada September 2020 berbanding -2.9 peratus pada Ogos 2020. Pada masa yang sama, import terus menunjukkan tanda pemulihan dengan penurunan yang lebih kecil iaitu 3.6 peratus disumbangkan oleh prestasi yang lebih baik bagi barangan modal dan penggunaan;
- b) Indeks Pengurus Pembelian (PMI) untuk sektor pembuatan menunjukkan peningkatan sebanyak 49 mata pada September 2020 berbanding nilai terendah pada tahun ini iaitu 31.3 mata pada April 2020;
- c) Pergerakan penumpang domestik meningkat 19.8 peratus pada September 2020 berbanding Ogos 2020 (10.8 peratus);
- d) Nilai jualan perdagangan borong dan runcit kembali pulih dan merekodkan pertumbuhan positif 0.2 peratus (tahun-ke-tahun) berbanding Ogos 2020 (-2.3 peratus) didorong oleh peningkatan jualan kenderaan bermotor;
- e) Indeks Pengeluaran Perindustrian (dengan izin, *Industrial Production Index*) terus merekodkan pertumbuhan positif

sebanyak 1 peratus (tahun-ke-tahun) pada September 2020 berbanding Mei 2020 (-21.6 peratus);

- f) Perbelanjaan kad kredit meningkat kepada RM11.3 bilion pada September berbanding RM8.7 bilion pada Mei 2020; dan
- g) Indeks Pelopor (IP) mencatatkan 108.5 mata pada Ogos 2020 berbanding 100.8 mata pada Ogos 2019 dengan kadar pertumbuhan tahunan sebanyak 7.6 peratus.

**Tuan Yang di-Pertua,**

4. Dalam memastikan kesejahteraan rakyat dan kemakmuran negara terjamin, Kerajaan telah mengumumkan Pakej Rangsangan Ekonomi Prihatin Rakyat (PRIHATIN), PRIHATIN PKS Tambahan, Pelan Jana Semula Ekonomi Negara (PENJANA) dan Kerangka Inisiatif Tambahan PRIHATIN (KITA PRIHATIN) yang bernilai RM305 bilion melalui pelaksanaan pelbagai inisiatif bagi membantu rakyat dan perniagaan sekaligus ke arah pemulihan ekonomi. Antara inisiatif yang diambil termasuklah:

Pemberian tunai one-off Bantuan Prihatin Nasional (BPN) dan tambahan RM100 one-off Bantuan Sara Hidup (BSH) serta bantuan tunai one-off kepada golongan mudah terjejas meliputi Orang Kelainan Upaya (OKU), ibu tunggal serta sukarelawan Khidmat Bantu di Rumah. Selain itu, bantuan tunai one-off turut disalurkan kepada golongan pemandu teksi, pemandu pelancong dan pemandu bas pelancong. Sehingga 16 Oktober 2020, keseluruhan bantuan ini telah diterima oleh seramai 15.12 juta penerima manfaat yang layak dan melibatkan nilai penyaluran sebanyak RM11.67 bilion;

- a) Pemberian diskaun bil elektrik yang berjumlah RM1.85 bilion untuk mengurangkan tekanan beban kewangan isi rumah;
- b) Pemberian moratorium ke atas pinjaman bagi tempoh April sehingga September 2020;

- c) Pemberian Geran Khas Prihatin (GKP) bagi membantu Perusahaan Kecil dan Sederhana (PKS) yang terkesan akibat penularan wabak COVID-19 dengan setiap PKS mikro yang berkelayakan akan diberi bantuan kewangan tunai secara one-off sebanyak RM3,000. Setakat 16 Oktober 2020 jumlah penyaluran GKP adalah berjumlah RM1.63 bilion yang memberi manfaat kepada 544,688 PKS mikro;
- d) Program Subsidi Upah bertujuan membantu meringankan beban kewangan majikan dan membantu mengekalkan pekerjaan. Sehingga 16 Oktober 2020, sebanyak RM11.901 bilion subsidi upah telah disalurkan yang memanfaatkan lebih 322,182 majikan serta lebih 2.6 juta pekerja;
- e) Pelancaran Skim Pembiayaan Mikro kredit PRIHATIN di bawah Bank Simpanan Nasional (BSN) dan Skim Pembiayaan Pemulihan Perniagaan Sektor Mikro TEKUN Nasional (CBRM) yang bertujuan menyediakan pembiayaan mudah kepada PKS Mikro pada kadar faedah 0 peratus. Penyediaan beberapa dana pembiayaan Soft Loans kepada PKS seperti Special Relief Facility (SRF), All Economic Sector Facility (AES), Agrofood Facility (AF) dan Automation and Digitalisation Facility (ADF) melalui Bank Negara Malaysia (BNM). PENJANA SME Financing (PSF) bagi membantu memulihkan PKS yang terjejas untuk memulakan semula perniagaan. Setakat 16 Oktober 2020, sebanyak 928,889 perniagaan telah mendapat manfaat daripada skim-skim ini yang melibatkan penyaluran sebanyak RM25.15 bilion;
- f) Penyediaan peruntukan sebanyak memperuntukkan RM4 bilion bagi melaksanakan projek Kerajaan berskala kecil bertujuan memanfaatkan kontraktor kecil (G1 dan G2) seterusnya memacu tindakan ke arah pemulihan ekonomi negara;

**Tuan Yang di-Pertua,**

5. Selain inisiatif yang dinyatakan di atas, Unit LAKSANA di bawah Kementerian Kewangan telah melaksanakan Kaji Selidik PRIHATIN bermula 19 Ogos sehingga 22 September 2020 bagi mengenal pasti keberkesanan pelaksanaan pakej rangsangan ekonomi. Kaji Selidik ini juga bertujuan bagi mendapatkan maklum balas dan respon individu serta perniagaan mengenai impak program di bawah PRIHATIN kepada mereka. Secara ringkasnya, dapatan daripada Kaji Selidik PRIHATIN bagi individu mendapati skor tahap kepuasan pelaksanaan PRIHATIN melebihi 80 peratus manakala bagi kaji selidik perniagaan, tahap kepuasan adalah 71.3 peratus bagi PKS Mikro, 69.7 peratus bagi PKS dan 70.5 peratus bagi syarikat besar.

**Tuan Yang di-Pertua,**

6. Belanjawan 2021 juga akan menjadi kesinambungan kepada pakej-pakej rangsangan ekonomi yang telah diumumkan sebelum ini bagi memastikan ekonomi negara pulih sepenuhnya dari krisis ini. Mengambil kira kesemua senario global dan domestik serta inisiatif yang telah dan sedang dijalankan, pertumbuhan ekonomi negara diunjur menguncup 4.5 peratus pada 2020 dan kembali meningkat antara 6.5 peratus hingga 7.5 peratus pada 2021 disokong oleh permintaan domestik dan jangkaan pemulihan di peringkat global.

Sekian, terima kasih.



**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATUK DR. HASAN BIN BAHROM  
[TAMPIN]**

**TARIKH : 16 NOVEMBER 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan apakah ada perancangan yang menyeluruh bagi membangunkan tanah-tanah terbiar yang terdapat di negara ini. Sekiranya ada apakah plan tindakan yang akan dilakukan oleh Kementerian bagi menjayakan pembangunan tanah tersebut.

**JAWAPAN**

**Tuan Yang di-Pertua,**

Pelbagai usaha telah dilaksanakan bagi memastikan tanah-tanah terbiar di kampung-kampung dapat dioptimumkan penggunaannya supaya penduduk-penduduk kampung menerima manfaat dari segi peningkatan taraf hidup dan secara tidak langsung memacu perkembangan ekonomi negara. Salah satu perancangan KPLB bagi membangunkan tanah terbiar adalah Projek Bersepadu Pembangunan Ekonomi Kampung (PROSPEK).

**Tuan Yang di-Pertua,**

PROSPEK ini merupakan satu projek yang memberi fokus kepada komponen ekonomi, prasarana asas dan perumahan. Komponen ekonomi ini menumpukan kepada *niche product* di kampung tersebut. Antara contoh projek yang telah dilaksanakan adalah

tanaman jagung di PROSPEK Rintis Kg.Sidam, Kulim, Kedah yang dilaksanakan oleh KEDA dan ternakan ikan air tawar di PROSPEK Rintis Kg. Pasir Raja, Dungun, Terengganu yang dilaksanakan oleh KETENGAH.

Projek tanaman jagung dan ternakan ikan air tawar ini dibuat diatas tanah–tanah dan kolam-kolam terbiar di kampung-kampung yang telah dikenalpasti melalui kerjasama strategik dengan agensi-agensi seperti Jabatan Pertanian, FAMA, Perikanan, Jabatan Perparitan dan Saliran selain daripada penglibatan secara langsung penduduk kampung melalui Majlis Pengurusan Komuniti Kampung (MPKK) dan Jawatankuasa Pengurusan Komuniti Kampung (JPKK).

**Tuan Yang di-Pertua,**

Bagi tahun 2020, pelaksanaan PROSPEK diperluaskan kepada 5 negeri lain iaitu Negeri Kelantan dengan *niche product* penternakan ayam daging, Negeri Pahang dengan tanaman musang king, Negeri Perak dengan penternakan rusa, Negeri Sabah dengan tanaman ubi kayu dan Negeri Sarawak dengan sesar unjur (udang salai). Bagi tahun 2021, KPLB berhasrat untuk meluaskan lagi pelaksanaan PROSPEK ini ke semua negeri untuk dilaksanakan.

Oleh itu, diharapkan pelaksanaan projek-projek ini dapat membantu membangunkan tanah-tanah terbiar yang ada di kawasan luar bandar.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN YAMANI HAFEZ BIN MUSA  
[ SIPITANG ]**

**TARIKH : 16 NOVEMBER 2020 (ISNIN)**

**SOALAN**

**TUAN YAMANI HAFEZ BIN MUSA [ SIPITANG ]** minta **MENTERI KOMUNIKASI DAN MULTIMEDIA** menyatakan berapa banyak menara pencawang baharu diluluskan untuk Sabah tahun ini, bagi memberikan akses internet kepada penduduk, terutama di kawasan pedalaman dan terpencil, selaras usaha merapatkan jurang digital di antara Sabah dan Sarawak dengan Semenanjung.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat terutama di negeri Sabah menikmati akses kepada perkhidmatan jalur lebar berkelajuan tinggi yang lebih menyeluruh.

Di bawah pelan Jalinan Digital Negara (JENDELA) yang diumumkan oleh YAB Perdana Menteri pada 29 Ogos 2020 lalu, bagi perkhidmatan jalur lebar mudah alih 4G, sejumlah 425 menara baharu akan dibina di negeri Sabah. Dari jumlah ini, 41 menara baharu akan dibina pada tahun 2020. Manakala, sebanyak 2,202 alat pemancar

komunikasi sedia ada akan dinaiktaraf kepada teknologi 4G termasuk 1,278 alat pemancar akan dinaik taraf pada tahun ini.

Sebagai tambahan, bagi jalur lebar talian tetap pula, sebanyak 190,115 premis akan disediakan akses kepada perkhidmatan berkelajuan gigabit melalui rangkaian gentian optik termasuk 41,227 premis yang akan dilaksanakan pada tahun ini. Kesemua inisiatif ini dijangka siap sepenuhnya menjelang penghujung tahun 2022.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' DR. XAVIER JAYAKUMAR A/L  
ARULANANDRAM [ KUALA LANGAT ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI TENAGA DAN SUMBER ASLI** menyatakan apakah kaedah pemantauan atau kawalan bagi pengorekan pasir laut di bawah Akta Pelantar Benua 1966 telah diberikan kepada pelesen-pelesen yang menepati syarat-syarat yang telah digariskan. Adakah ini memanfaatkan Kementerian dari segi sumber hasil dan apakah tindakan-tindakan yang diambil untuk mengelak kesan serta berlaku kecurian pasir dasar laut.

**JAWAPAN**

**Tuan Yang di-Pertua,**

1. Untuk makluman, mana-mana syarikat yang telah diluluskan lesen di bawah Akta Pelantar Benua 1966 perlu mengemukakan permohonan kebenaran beroperasi kepada Jabatan Ketua Pengarah Tanah dan Galian Persekutuan sebelum boleh memulakan aktiviti pengorekan pasir. Kapal-kapal yang digunakan bagi tujuan pengorekan pasir laut juga diwajibkan untuk memasang Sistem Pemantauan Operasi Pengorekan Pasir atau '*Dredging and Dumping Management System*' (DDMS) yang merupakan satu alat kawalan yang boleh mengesan kedudukan dan pergerakan kapal pasir tersebut. Sistem ini turut digunakan oleh Agensi Penguatkuasaan Maritim Malaysia (APMM) bagi tujuan pemantauan.

2. Penggunaan sistem, kerjasama bersepadu serta pemantauan dan tindakan penguatkuasaan berkala dengan APMM dan Pasukan Polis Marin (PPM) dapat mengurangkan aktiviti kecurian pasir dasar laut seterusnya meningkatkan kutipan hasil negara. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK ZAKARIA BIN MOHD EDRIS@TUBAU  
[LIBARAN]**

**TARIKH : 16 NOVEMBER 2020 (ISNIN)**

**SOALAN**

**DATUK ZAKARIA BIN MOHD EDRIS@TUBAU [ LIBARAN ]** minta **MENTERI KEWANGAN** menyatakan apakah status ekonomi dan kedudukan kewangan negara Malaysia akibat penularan pandemik COVID-19.

**JAWAPAN**

**Tuan Yang di-Pertua,**

1. Berdasarkan unjuran Tabung Kewangan Antarabangsa atau IMF, kemelesetan ekonomi dunia berikutan situasi ketegangan perdagangan dan ketidaktentuan harga komoditi yang diburukkan lagi dengan penularan pandemik COVID-19 merupakan krisis yang paling genting sejak era *the Great Depression* pada tahun 1930an. Lebih 150 negara termasuk Malaysia dijangka merekodkan penguncupan ekonomi pada tahun ini. Sebagai sebuah negara yang terbuka, ekonomi negara turut sama terjejas dengan perkembangan ini. KDNK kita telah mencatatkan penguncupan sebanyak 8.3 peratus bagi tempoh separuh pertama 2020. Ini juga disebabkan oleh langkah pembendungan yang ketat bagi mengawal penularan pandemik COVID-19 sama ada di peringkat global mahupun domestik. Langkah dalam negara yang dilaksanakan bertujuan untuk menyelamatkan nyawa dan melindungi kehidupan rakyat, sungguhpun Kerajaan menyedari impak pelaksanaan Perintah Kawalan Pergerakan tersebut ke atas ekonomi negara.
2. Bagi memastikan kebajikan rakyat terus terjamin dan pada masa yang sama menggerakkan semula ekonomi, Kerajaan telah mengambil langkah segera dan proaktif dengan melaksanakan pelbagai pakej rangsangan ekonomi yang kesemuanya bernilai RM305 bilion. Pelaksanaan pakej rangsangan ekonomi yang inklusif ini dijangka menyumbang sekitar 4 mata peratusan kepada pertumbuhan KDNK negara. Dengan pelaksanaan pakej-pakej berkenaan dan ditambah dengan pembukaan semula aktiviti ekonomi secara berfasa, ekonomi dijangka pulih secara beransur-ansur terutamanya pada separuh tahun kedua.
3. Pemulihan dalam ekonomi negara dapat dilihat melalui pertumbuhan KDNK bulanan yang bertambah baik. Beberapa petunjuk ekonomi negara memperlihatkan peningkatan melalui indikator bulan Ogos dan September. Alhamdulillah, prestasi ekonomi pada suku ketiga 2020 lebih baik berbanding suku kedua 2020. Pertumbuhan Keluaran Dalam Negeri Kasar (KDNK) suku tahun ketiga 2020 mencatat penyusutan lebih kecil sebanyak 2.7 peratus berbanding -17.1 peratus

pada suku tahun kedua 2020. Dari sudut suku-ke-suku yang disesuaikan mengikut musim (seasonally-adjusted basis), ekonomi Malaysia telah pulih semula sebanyak 18.2 peratus (S2 2020: -16.5 peratus). Secara keseluruhan, ekonomi Malaysia bagi tahun 2020 dianggar menguncup sebanyak 4.5 peratus sebelum kembali pulih dan berkembang antara 6.5 peratus hingga 7.5 peratus pada tahun 2021.

**Tuan Yang di-Pertua,**

4. Penularan pandemik COVID-19 dan pengenalan pakej rangsangan dan pelan pemulihan ekonomi dijangka memberi kesan kepada kedudukan kewangan Kerajaan Persekutuan. Kutipan hasil Kerajaan pada tahun 2020 yang disemak semula dianggarkan berkurang sebanyak RM17.2 billion atau 7% kepada RM227.3 bilion berbanding anggaran asal. Ini adalah selari dengan KDNK yang dijangka menguncup dan jangkaan harga minyak mentah yang rendah sekitar USD40 setong. Jumlah perbelanjaan pula dianggar meningkat kepada RM314.7 bilion susulan pertambahan perbelanjaan bagi melaksanakan pakej rangsangan dan pelan pemulihan ekonomi. Justeru, defisit fiskal pada tahun 2020 telah disemak semula dan dianggar meningkat daripada 3.2% kepada 6.0% berbanding KDNK.

5. Kedudukan kewangan 2021 juga dijangka bertambah baik selaras dengan pertumbuhan ekonomi. Justeru, jumlah hasil Kerajaan dijangka meningkat kepada RM236.9 bilion manakala jumlah perbelanjaan dianggar sebanyak RM322.5 bilion. Sehubungan itu, defisit fiskal diunjur lebih rendah iaitu 5.4% daripada KDNK pada 2021. Kerajaan komited bagi mengurangkan defisit fiskal secara berperingkat tanpa menjejaskan momentum pemulihan ekonomi.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA 2020, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : NOR AZRINA BINTI SURIP [MERBOK]**  
**TARIKH : 16 NOVEMBER 2020 (ISNIN)**

**SOALAN**

Minta **MENTERI PENGAJIAN TINGGI** menyatakan apakah solusi segera Kementerian untuk menyelesaikan isu mahasiswa yang tinggal di kawasan luar bandar yang mempunyai talian internet yang perlahan bagi menghadapi pembelajaran atas talian.

**JAWAPAN**

**Tuan Yang di-Pertua,**

Kementerian sentiasa prihatin terhadap pelajar IPT terutama di kawasan luar bandar yang sukar mendapat akses kepada internet bagi mengikuti sesi Pengajaran dan Pembelajaran (PdP) secara dalam talian. Antara respon strategik kementerian untuk mengatasi perkara ini adalah:

- i. Menyalurkan maklumat 871 lokasi kemudahan pusat internet di bawah seliaan Kementerian Komunikasi dan Multimedia Malaysia (KKMM) kepada universiti-universiti awam untuk dimanfaatkan oleh pelajar;
- ii. Menyediakan bantuan berbentuk sumbangan pelan data bagi capaian internet kepada 320,396 pelajar daripada kalangan keluarga B40 di universiti awam. Seramai 225,784 pelajar menerima bantuan dalam bentuk simkad manakala 94,612 pelajar menerima bantuan berbentuk tunai bagi pembelian pelan data mengikut syarikat telekomunikasi pilihan masing-

masing. Anggaran peruntukan keseluruhan inisiatif ini berjumlah RM24 juta;

- iii. Menyediakan bantuan pemilikan peranti kepada 8,965 pelajar daripada kalangan keluarga B40. Daripada jumlah tersebut, seramai 5,965 pelajar menerima sumbangan berbentuk komputer riba, 300 pelajar menerima bantuan berbentuk pinjaman kewangan untuk pembelian komputer dan selebihnya 2,700 pelajar menerima bantuan berbentuk tunai bagi tujuan pembelian peranti. Anggaran peruntukan bagi menjayakan usaha ini adalah sebanyak RM13.4 juta; dan
- iv. Memberikan bantuan tunai sebanyak RM50 secara *one-off* kepada setiap pelajar baharu bagi sesi Akademik 2020/2021 untuk meringankan beban kos yang ditanggung mereka bagi mengikuti sesi PdP secara dalam talian. Bantuan ini melibatkan peruntukan berjumlah RM3.8 juta.

Selain itu, dalam jangka masa sederhana, kementerian melalui inisiatif *Malaysian Research & Education Network (MYREN)* akan melaksanakan peningkatan ke atas kapasiti jalur lebar di institusi pengajian tinggi awam (IPTA) kepada antara 500Mbps hingga 10Gbps dengan peruntukan sebanyak RM50 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. KELVIN YII LEE WUEN  
[ BANDAR KUCHING ]**

**TARIKH : 16 NOVEMBER 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan tentang pelan Kementerian untuk membina lebih rumah mampu milik di Kuching dan seluruh Sarawak. Apakah status penyelesaian pembeli-pembeli awal Perbadanan PR1MA yang telah mengalami kerugian kewangan akibat rebate yang dikenakan untuk pembeli lain di bawah Kempen Pemilikan Rumah (HOC) pada tahun 2019.

**JAWAPAN**

**Tuan Yang di-Pertua,**

1. Untuk makluman Yang Berhormat, antara pelan Kementerian Perumahan dan Kerajaan Tempatan (KPKT) untuk membina lebih banyak Rumah Mampu Milik (RMM) di seluruh negara termasuk Kuching, Sarawak ialah melalui penyelarasan RMM di bawah program dan skim perumahan seperti berikut:

- (a) Program Perumahan Rakyat (PPR);
- (b) Perumahan Penjawat Awam Malaysia (PPAM);
- (c) Skim Perumahan Mampu Milik Swasta (MyHome);
- (d) Perumahan PR1MA; dan
- (e) Program Perumahan Syarikat Perumahan Negara Berhad (SPNB).

**Program Perumahan Rakyat (PPR)**

2. Sehingga 30 September 2020, sebanyak 11 projek PPR yang melibatkan 5,252 unit rumah telah siap dan sedang dibina di Sarawak. Daripada jumlah tersebut, 8 projek PPR merangkumi 4,140 unit rumah telah siap dibina dan 3 projek PPR masih dalam pembinaan yang melibatkan 1,112 unit rumah. Senarai projek PPR di Negeri Sarawak sehingga 30 September 2020 adalah seperti berikut:

<b>Bil.</b>	<b>Projek Siap</b>	<b>Bil. Unit</b>	<b>Kos Projek (RM)</b>
1.	PPR Sri Wangi	200	13,972,794.00
2.	PPR Batu 5	816	59,833,300.00
3.	PPR Batu Gong, Siburan	500	43,500,000.00
4.	PPR Seduan	500	63,500,000.00
5.	PPR Kemena	1,000	131,500,000.00
6.	PPR Lambir	505	88,700,000.00
7.	PPR Samarahan	180	32,850,000.00
8.	PPR Sg. Tengah	439	74,630,000.00
<b>Jumlah</b>		<b>4,140</b>	<b>508,486,094.00</b>

	Dalam Pembinaan	Bil. Unit	Kos Projek (RM)
1.	PPR Petrajaya	208	38,100,000.00
2.	PPR Landeh	443	82,672,242.00
3.	PPR Seduan, Sibu	461	99,330,400.00
<b>Jumlah</b>		<b>1,112</b>	<b>220,102,642.00</b>

### Perumahan Penjawat Awam Malaysia (PPAM)

3. Sehingga Oktober 2020, sebanyak 7 projek PPAM yang melibatkan 1,793 unit rumah dalam pelbagai peringkat pembinaan di Sarawak. Daripada jumlah tersebut, 2 projek PPAM merangkumi 544 unit rumah telah siap dibina, 3 projek PPAM masih dalam pembinaan yang melibatkan 711 unit rumah dan 2 projek PPAM dengan 538 unit PPAM masih dalam peringkat kelulusan pelan bangunan serta perancangan. Senarai projek PPAM di Negeri Sarawak adalah seperti berikut:

BIL	LOKASI	STATUS	BILANGAN UNIT
1.	Muara Tuang	Siap	340
2.	Miri (Eastwood Valley)	Siap	204
3.	Kota Samarahan	Dalam Pembinaan (86.95%)	300
4.	Sibu	Dalam Pembinaan (53.60%)	219
5.	Tabuan Jaya	Dalam Pembinaan (50.70%)	192
6.	Matang	Kelulusan Pelan Bangunan	198
7.	Miri (Jalan Pujut)	Perancangan	340
<b>JUMLAH</b>			<b>1,793</b>

### Perumahan PR1MA

4. Untuk makluman Yang Berhormat, setakat 21 Oktober 2020, terdapat 2 projek PR1MA yang telah siap dibina di Sarawak iaitu Residensi Matang dan Residensi Bintawa Riverfront, manakala 1 projek sedang dalam pembinaan iaitu Residensi Semenggoh Fasa 1. Selain itu,

terdapat satu projek PR1MA yang sedang dalam perancangan untuk dibangunkan pada masa hadapan iaitu Residensi Semenggoh Fasa 2 dengan jumlah 702 unit kediaman.

5. Turut disertakan status terkini bagi projek-projek PR1MA sedia ada di Sarawak seperti berikut:

Bil	Nama Projek	Lokasi	Bil. Unit	Status (Oktober 2020)	Tarikh Siap/ Jangka Siap
1.	Residensi Matang	Petra Jaya	912	Siap	28 Januari 2019
2.	Residensi Bintawa Riverfront	Bandar Kuching	1,320	Siap	3 Januari 2020
3.	Residensi Semenggoh	Mambong	Fasa 1 - 558	Dalam Pembinaan (94.92%)	31 Disember 2020
			Fasa 2 - 702	Dalam Perancangan	-
		JUMLAH	3,492		

6. Untuk makluman Yang Berhormat, satu perjumpaan di antara YB Menteri KPKT bersama pembeli-pembeli awal rumah PR1MA telah diadakan pada 7 November 2019. Objektif perjumpaan tersebut adalah untuk memberi peluang kepada pembeli-pembeli awal rumah PR1MA memberikan maklum balas secara langsung kepada YB Menteri KPKT. Maklum balas dan cadangan daripada pembeli-pembeli awal pada perjumpaan tersebut telah dikumpulkan untuk diteliti oleh PR1MA.

7. Walau bagaimanapun, buat masa ini terdapat beberapa pembeli awal yang membuat tuntutan mahkamah yang masih lagi dalam peringkat penelitian dan pertimbangan mahkamah. Justeru, sebarang keputusan berkenaan perkara ini tertakluk kepada keputusan mahkamah yang akan diketahui kelak.

### Program Perumahan SPNB

8. Untuk makluman Yang Berhormat, SPNB menawarkan 2 jenis program perumahan di negeri Sarawak iaitu Program Kediaman SPNB dan Rumah Mesra Rakyat (RMR).

9. Statistik pembinaan program Kediaman SPNB adalah seperti berikut:

Bil.	Nama Pembangunan	Status	Bil Unit
1.	Vista Ilmu, Kota Samarahan	Telah Siap	1,152
2.	Vista Perdana, Miri (Fasa 1)	Telah Siap	963
3.	Vista Perdana, Miri (Fasa 2)	Telah Siap	789
4.	Vista Perdana, Miri (Fasa 3)	Dalam Perancangan	951
5.	Vista Wawasan (Fasa 2 – 6), Kuching	Dalam Perancangan	1,553
<b>JUMLAH UNIT</b>			<b>5,408</b>

10. Bagi Program Rumah Mesra Rakyat (RMR) pula, di negeri Sarawak, program ini dilaksanakan melalui kerjasama SPNB dan Perbadanan Perumahan Sarawak (HDC). Berdasarkan semakan, sebanyak 4,677 permohonan telah diterima. Daripada jumlah tersebut, sebanyak 1,936 (42%) permohonan telah diluluskan iaitu 1,422 unit rumah telah siap dibina dan baki 514 unit adalah di dalam pelbagai peringkat pelaksanaan. Manakala 2,253 permohonan telah ditolak disebabkan tidak mematuhi syarat-syarat kelayakan. Sebanyak 488 permohonan pula masih dalam proses penilaian (dinilai layak) bagi negeri Sarawak pada masa kini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN HAJAH FUZIAH BINTI SALLEH  
[ KUANTAN ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI PENGAJIAN TINGGI** menyatakan keberkesanan pembelajaran dan pengajaran atas talian di kalangan pensyarah dan mahasiswa. Sama ada telah dilaksanakan kajian berkenaan faktor-faktor yang merupakan halangan kepada keberkesanan pembelajaran atas talian.

**JAWAPAN**

**Tuan Yang di-Pertua,**

Kementerian amat mengambil berat terhadap kualiti dan keberkesanan sesi Pengajaran dan Pembelajaran (PdP) secara dalam talian. Secara umumnya, faktor-faktor yang mempengaruhi kualiti dan keberkesanan PdP adalah:

- i. Ketersediaan infrastruktur komunikasi yang baik, bagi membolehkan pelajar dan pensyarah menjalankan sesi PdP secara dalam talian. Bagi maksud ini, institusi pengajian tinggi (IPT) telah mengoptimumkan penggunaan platform seperti *Open Educational Resources (OER)*, *Open CourseWare (OCW)*, *Massive Open Online Courses (MOOCs)*, *Learning Management System (LMS)*, *BigBlueButton*, *Facebook Live*, *YouTube*, *Google Classroom*, *Google Meet*, *Zoom* dan *Microsoft Teams* untuk



memastikan sesi pembelajaran secara maya dapat dijalankan dengan berkesan;

- ii. Kandungan modul pembelajaran dalam talian yang berkualiti. Kementerian melalui Unit Jaminan Kualiti di IPT memantau secara dekat kualiti modul pembelajaran dalam talian dan keberkesanan sesi PdP yang dijalankan. Penambahbaikan secara berterusan akan dilaksanakan terhadap kandungan dan kaedah penyampaian sekiranya timbul sebarang masalah;
- iii. Kapasiti jalur lebar di IPT yang lebih tinggi bagi membolehkan pelajar mendapat akses internet dengan lebih baik. Kementerian melalui inisiatif *Malaysian Research & Education Network (MYREN)* akan melaksanakan peningkatan ke atas kapasiti jalur lebar di institusi pengajian tinggi awam (IPTA) kepada antara 500Mbps hingga 10Gbps dengan peruntukan sebanyak RM50;
- iv. Kemudahan peranti dan pelan data terutamanya kepada pelajar. Bagi tujuan ini, kementerian telah menyediakan bantuan berbentuk sumbangan pelan data bagi capaian internet kepada 320,396 pelajar dan bantuan pemilikan peranti kepada 8,965 pelajar daripada kalangan keluarga B40 di universiti-universiti awam. Anggaran peruntukan keseluruhan inisiatif ini berjumlah RM37.4 juta; dan
- v. Keupayaan dan kemahiran pensyarah mengendalikan sesi PdP secara dalam talian. Kementerian melalui IPT melaksanakan latihan peningkatan kapasiti secara berterusan kepada pensyarah bagi meningkatkan kemahiran pengajaran secara dalam talian mereka.

Sebagai usaha untuk pastikan sesi PdP secara dalam talian dapat memberikan hasil pembelajaran yang berkualiti kepada pelajar, kementerian akan sentiasa memantau pelaksanaannya secara dekat dan melakukan penambahbaikan dari masa ke semasa.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' HAJI AHMAD NAZLAN BIN IDRIS  
[JERANTUT]**

**TARIKH : 16 NOVEMBER 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan adakah Kementerian bercadang memberikan pembiayaan khas kepada usahawan MARA yang terkesan dengan wabak COVID-19 memandangkan wabak ini masih belum reda.

**JAWAPAN**

**Tuan Yang di-Pertua,**

Untuk makluman Yang Berhormat,

MARA sentiasa peka dan prihatin terhadap keperluan usahawan bumiputera dalam mengharungi cabaran dan kesan pandemik Covid-19 terhadap prestasi perniagaan mereka.

Antara langkah yang telah diambil oleh MARA dalam membantu usahawan yang terkesan akibat pandemik ini adalah dengan menyediakan skim pembiayaan seperti berikut:

- i. Skim Pembiayaan Am Khas (SPAK) – Skim ini memberi pembiayaan khas dengan maksimum adalah sebanyak RM10,000 kepada para usahawan. Setakat 30 September 2020, seramai 1,339 usahawan telah mendapat manfaat daripada skim ini dengan implikasi kewangan sebanyak RM10.83 juta.

- ii. Skim Pembiayaan Perniagaan PKS – Setakat 30 September 2020, seramai 111 usahawan telah diluluskan melalui pembiayaan khas ini dengan implikasi kewangan sebanyak RM81.3juta.

Seterusnya, MARA juga mempunyai pelbagai Skim Pembiayaan Perniagaan yang sedia ada dan sentiasa terbuka untuk usahawan memohon melalui pejabat MARA di kawasan mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHANG LIH KANG [ TANJONG MALIM ]**

**TARIKH : 16 NOVEMBER 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan perbelanjaan yang disediakan oleh Kerajaan untuk **Penggerak Komuniti Tempatan (PeKT)** di seluruh negara. Apakah peranan dan bidang kuasa PeKT.

**JAWAPAN**

**Tuan Yang di-Pertua,**

1. Untuk makluman Yang Berhormat, pelaksanaan Penggerak Komuniti Tempatan (PeKT) melibatkan 3 negeri sahaja iaitu Selangor, Pulau Pinang dan Negeri Sembilan yang merangkumi kawasan dari 46 buah Pihak Berkuasa Tempatan (PBT). Perbelanjaan yang disediakan oleh Kementerian Perumahan dan Kerajaan Tempatan (KPKT) untuk PeKT akan menggunakan peruntukan Belanja Mengurus, KPKT dengan anggaran perbelanjaan tahunan sebanyak RM17,136,000.00.

2. Bagi tahun 2020, pelaksanaan program adalah selama empat bulan sahaja iaitu mulai September hingga Disember 2020 dan melibatkan implikasi kewangan sebanyak RM2,663,020.00.

3. Peranan PeKT adalah seperti berikut :

- (a) menyampaikan maklumat kepada penduduk setempat berhubung dasar dan inisiatif di bawah Kementerian Perumahan dan Kerajaan Tempatan;
- (b) mewujudkan komuniti yang bersatu padu dan berdaya saing melalui aktiviti-aktiviti kesejahteraan bandar dan seterusnya memperkasakan komuniti dan generasi yang lebih mampan;
- (c) memantau dan membantu menggerakkan penglibatan komuniti dalam meningkatkan keharmonian komuniti setempat;
- (d) menjalankan kegiatan khidmat nasihat bagi memelihara kebersihan, kesihatan dan alam sekitar di sesebuah komuniti; dan
- (e) mendapatkan respon dan maklum balas awal komuniti setempat sebelum sesuatu projek atau program dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATUK MOHAMAD BIN ALAMIN  
[ KIMANIS ]**

**TARIKH : 16 NOVEMBER 2020 (ISNIN)**

**SOALAN**

**DATUK MOHAMAD BIN ALAMIN [ KIMANIS ] minta MENTERI KOMUNIKASI DAN MULTIMEDIA menyatakan :-**

- a) apakah usaha Kementerian khususnya Suruhanjaya Komunikasi Multimedia Malaysia (SKMM) dalam mempertingkatkan tahap (connectivity) dan kualiti pengalaman perkhidmatan komunikasi di Sabah supaya setanding maju dengan negeri-negeri di Semenanjung. Khususnya langkah proaktif dalam masa terdekat untuk mengatasi kelompongan rangkaian (Network gap) di pedalaman Sabah; dan
- b) adakah inisiatif seperti program kesedaran penggunaan internet masih giat dijalankan khususnya dalam talian yang mensasarkan para pengguna media sosial bagi menangani penularan berita tidak sahih yang memberi impak buruk dan persepsi negatif kepada Kerajaan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian dengan kerjasama Suruhanjaya Komunikasi dan Multimedia Malaysia (SKMM) sentiasa memberikan tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi di seluruh negara terutamanya di kawasan luar bandar termasuk di Sabah.

Di bawah pelan Jalinan Digital Negara (JENDELA) yang diumumkan oleh YAB Perdana Menteri pada 29 Ogos 2020 lalu, penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.

Sasaran fasa pertama yang kini telah bermula dan akan berakhir pada tahun 2022 ialah :

- a. penambahan premis yang akan mendapat akses jalur lebar tetap berkelajuan gigabit daripada 4.95 juta premis kepada 7.50 juta premis;
- b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. peningkatan kelajuan purata jalur lebar mudah alih daripada 25Mbps kepada 35Mbps.

Untuk itu, sebanyak 190,115 premis di negeri Sabah akan disediakan akses kepada perkhidmatan berkelajuan gigabit melalui peluasan rangkaian gentian optik. Bagi perkhidmatan jalur lebar mudah alih pula, sejumlah 425 menara baharu akan dibina, manakala sebanyak 2,202 alat pemancar komunikasi sedia ada akan dinaik taraf kepada teknologi 4G.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

Untuk makluman Ahli Yang Berhormat juga, kaedah terbaik dalam memerangi maklumat berita palsu adalah dengan 'membanjiri' ruang maklumat dengan berita benar. Sehubungan itu, pihak Kementerian akan meneruskan inisiatif kesedaran serta pengupayaan dan pendidikan pengguna atau "*user empowerment and education*" melalui pelbagai program advokasi dan kesedaran di media dan di lapangan. Usaha-usaha ini merupakan kesinambungan kepada inisiatif sedia ada dalam usaha memupuk kesedaran awam mengenai gejala perkongsian dan penyebaran berita palsu, membudayakan amalan menyemak dan menentukan kesahihan sesuatu berita daripada sumber yang rasmi atau boleh dipercayai sebelum dikongsi atau disebarkan, serta membudayakan amalan menyebarkan kebenaran.

Pihak Kementerian atau pihak berautoriti pada ketika ini memainkan peranan aktif dalam mengesan dan memantau penularan berita/maklumat yang tidak benar yang timbul atau tular melibatkan perkara-perkara yang berada di dalam ruang lingkup pengawalseliaan serta bidang kuasa mereka, seterusnya mengeluarkan kenyataan menafikan sebarang berita palsu atau menjelaskan sebarang berita yang tidak tepat dan mengelirukan melibatkan isu atau perkara yang berada di dalam skop peranan, bidang tugas atau kepakaran khusus mereka. Kenyataan-kenyataan penafian atau penjelasan yang dibuat akan disebarkan oleh Pasukan Respons Pantas (PRP) KKMM serta diterbitkan dalam portal Sebenarnya.my sebagai repositori kepada berita-berita yang telah ditentukan dan untuk menjadi sumber rujukan bagi orang ramai menentusahkan sesuatu berita yang tular.

**Portal Sebenarnya.my** telah menerima **203** juta layaran semenjak dilancarkan pada Mac 2017 sehingga 30 September 2020. Portal ini juga telah menerima **11,150** panyaluran maklumat daripada orang awam (maklumat mengenai berita yang tidak ditentukan kesahihannya,



dengan purata **264** saluran maklumat setiap bulan. Peningkatan yang mendadak telah berlaku terhadap “hits” dan penyaluran maklumat adalah ekor daripada penularan berita-berita yang diragui kesahihannya berkenaan wabak Covid-19 yang sedang melanda.

Selain daripada Portal Sebenarnya.my, Kementerian juga telah menjalankan **Kempen “Kebebasan Bersuara bukan Kebebasan Berbohong”** serta penubuhan **Jawatankuasa Jenayah Siber PDRM-MCMC** sebagai salah satu inisiatif untuk memupuk kesedaran serta mendidik masyarakat Malaysia agar tidak mudah terjebak menjadi mangsa virus berita palsu secara proaktif melalui penglibatan pihak media seperti stesen-stesen televisyen; merangkumi awam dan swasta, media cetak serta media dalam talian.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI SAINS, TEKNOLOGI DAN INOVASI** menyatakan benarkah Agensi Tenaga Atom Antarabangsa (IAEA) telah mengatakan bahawa 'Lynas operations is safe'. Sekiranya ya, nyatakan dokumen yang mengesahkan kenyataan ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Agensi Tenaga Atom Antarabangsa (International Atomic Energy Agency, IAEA) telah menjalankan penilaian ke atas operasi Lynas sebanyak 2 kali.

**i. Kali pertama pada 29 Mei 2011 hingga 3 Jun 2011**

Misi Pakar Bebas Antarabangsa IAEA yang pertama pada 2011 bertujuan untuk menilai operasi Lynas Advanced Material Plant (LAMP) dari segi perundangan, proses dan prosedur yang dilaksanakan di Malaysia serta mendapatkan pandangan daripada orang awam termasuk persatuan penduduk, organisasi bukan kerajaan, badan profesional dan parti politik berkenaan kesan pembangunan LAMP.

Penemuan utama yang telah dilaporkan oleh IAEA dalam laporannya adalah bahawa panel penilai tidak menemui sebarang

pelanggaran operasi LAMP terhadap standard keselamatan sinaran yang digunakan di peringkat antarabangsa.

Susulan daripada penilaian tersebut, satu laporan bertajuk *Report of the International Review Mission on the Radiation Safety Aspects of a Proposed Rare Earths Processing Facility (the Lynas Project) 2011* telah diserahkan kepada kerajaan pada 30 Jun 2011 dan telah dipamerkan kepada umum melalui laman web IAEA.

**ii. Kali kedua pada tahun 13 - 17 Oktober 2014**

Misi Pakar Bebas Antarabangsa IAEA yang kedua pada 2014 telah melawat LAMP bagi penilaian semula ke atas syor yang dikemukakan oleh IAEA pada tahun 2011. Panel Pakar Bebas Antarabangsa IAEA melaporkan bahawa Kerajaan Malaysia dan LAMP telah melaksanakan semua syor yang dikemukakan pada tahun 2011.

Berdasarkan rumusan laporan, IAEA telah menyatakan bahawa penilaian ke atas operasi LAMP menunjukkan risiko radiologi ke atas orang awam dan alam sekitar adalah sangat rendah (*intrinsicly low*).

Hasil penilaian ini telah dilaporkan menerusi *Report of the International Post-Review Mission on the Radiation Safety Aspects of the Operation of a Rare Earth Processing Facility and Assessment of the Implementation of the 2011 Mission Recommendations 2014*.

**Tuan Yang di-Pertua,**

Kedua-dua laporan penemuan daripada IAEA ini juga telah dimasukkan ke dalam Laporan Jawatankuasa Eksekutif Penilaian Operasi Lynas Advanced Materials Plant (LAMP) 2018. Kedua-dua laporan ini juga boleh diakses melalui laman web AELB.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATUK HAJAH AZIZAH BINTI DATUK  
SERI PANGLIMA HAJI MOHD DUN  
[ BEAUFORT ]**

**TARIKH : 16 NOVEMBER 2020 (ISNIN)**

**SOALAN**

**DATUK HAJAH AZIZAH BINTI DATUK SERI PANGLIMA HAJI MOHD DUN [ BEAUFORT ]** minta **MENTERI KOMUNIKASI DAN MULTIMEDIA** menyatakan berapa jumlah daerah yang telah dinaik taraf capaian internet di Sabah pada tahun ini dan yang akan dinaik taraf pada tahun hadapan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat terutama di negeri Sabah menikmati akses kepada perkhidmatan jalur lebar berkelajuan tinggi yang lebih menyeluruh.

Setakat bulan September 2020, antara inisiatif-inisiatif penyediaan perkhidmatan jalur lebar di Sabah adalah seperti berikut:

- a. sebanyak 444 menara baharu telah siap dibina dan telah beroperasi di 26 daerah seluruh Sabah. Sejumlah 61 menara baharu pula sedang dalam peringkat pelaksanaan di 15 daerah

di sekitar negeri Sabah bagi penyediaan perkhidmatan jalur lebar mudah alih 4G. Kesemua menara ini dijangka siap dan beroperasi sepenuhnya secara berperingkat bermula suku pertama 2021;

- b. sebanyak 1,166 alat pemancar komunikasi di menara komunikasi sedia ada meliputi sembilan (9) daerah telah siap dinaiktaraf manakala, baki empat (4) alat pemancar komunikasi di menara komunikasi sedia ada di Bahagian Pantai Barat sedang dalam peringkat penaiktarafan ke perkhidmatan jalur lebar mudah alih 4G; dan
- c. sebanyak 44,713 sambungan jalur lebar talian tetap di pinggir bandar di 22 daerah telah siap sepenuhnya.

Di bawah pelan Jalinan Digital Negara (JENDELA) yang diumumkan pada 29 Ogos 2020 lalu, untuk perkhidmatan jalur lebar mudah alih sejumlah 425 menara baharu akan dibina di negeri Sabah. Dari jumlah ini, 41 menara baharu akan dibina pada tahun 2020 dan 115 pada tahun 2021. Manakala sebanyak 2,202 alat pemancar komunikasi sedia ada akan dinaik taraf kepada teknologi 4G, termasuk 1,278 alat pemancar akan dinaik taraf pada tahun ini dan 924 alat pemancar akan di naik taraf pada tahun 2021.

Sebagai tambahan, bagi jalur lebar talian tetap pula, sebanyak 190,115 premis akan disediakan akses kepada perkhidmatan berkelajuan gigabit melalui rangkaian gentian optik termasuk 41,227 premis akan dilaksanakan pada tahun ini dan 82,628 premis akan dilaksanakan pada tahun 2021.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN RAMLI BIN DATO' MOHD NOR  
[CAMERON HIGHLANDS]**

**TARIKH : 16 NOVEMBER 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan bilakah pihak Kementerian akan membaik pulih dan menaik taraf jalan pedalaman Pos Senderut iaitu dari jalan utama Sungai Koyan-Raub ke Kampung Hulu Senderut serta membina jalan baharu dari Kampung Hulu Senderut ke Kampung Labu.

**JAWAPAN**

**Tuan Yang di-Pertua,**

Jalan utama dari Sungai Koyan-Raub ke Pos Sinderut adalah di bawah penyelenggaraan MARRIS dan diselia oleh JKR Kuala Lipis. Manakala jalan dari Kampung Hulu Sinderut ke Kampung Labu telah dinaiktaraf oleh JAKOA kepada *crusher run* pada tahun 2019.

Untuk makluman YB Cameron Highlands juga, dalam tempoh 5 tahun RMKe-12, JAKOA telah mengemukakan permohonan projek pembinaan jalan di perkampungan Orang Asli kepada EPU sepanjang 150km. Dari jumlah tersebut, sebanyak 20km jalan baru akan dibina manakala 30km lagi akan dinaiktaraf di lokasi-lokasi yang memerlukan di negeri Pahang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' DR. XAVIER JAYAKUMAR  
A/L ARULANANDRAM [KUALA LANGAT]**

**TARIKH : 16 NOVEMBER 2020 (ISNIN)**

**SOALAN**

**DATO' DR. XAVIER JAYAKUMAR A/L ARULANANDRAM [ KUALA LANGAT ]** minta **MENTERI KEWANGAN** menyatakan apakah pelan Kerajaan untuk membantu kos sara hidup peniaga kecil seperti pasar pagi dan malam, memandangkan sumber pendapatan mereka terjejas semasa waktu PKPB ini.

**JAWAPAN**

**Tuan Yang di-Pertua,**

Sepertimana Ahli Yang Berhormat sedia maklum, wabak COVID-19 yang melanda negara telah memberi ancaman bukan sahaja kepada kelangsungan ekonomi dan perniagaan, tetapi juga ke atas nyawa dan kesihatan rakyat di negara ini. Lantaran itu, kita berdepan dengan cabaran untuk mengimbangi di antara menyelamatkan nyawa dan melindungi kehidupan.

Penularan COVID-19 yang semakin meningkat baru-baru ini di beberapa negeri telah mengakibatkan Kerajaan terpaksa melaksanakan PKPB. Benar, dengan perintah kawalan pergerakan ini, kelangsungan hidup rakyat agak terjejas termasuklah bagi golongan peniaga kecil pasar pagi dan malam. Maka, bagi membantu meringankan beban kewangan golongan peniaga kecil dalam mendepani tempoh PKPB ini, Kerajaan telah menyediakan inisiatif atau bantuan di bawah pelbagai pakej rangsangan ekonomi, antaranya seperti berikut:

- i. Pemberian Geran Khas Prihatin (GKP) 2.0 di bawah Pakej KITA PRIHATIN, untuk membantu Perusahaan Kecil dan Sederhana (PKS) mikro yang terkesan akibat penularan wabak COVID - 19. Melalui GKP2.0, setiap PKS mikro yang berkecayaan yang belum menerima GKP sebelum ini, akan diberi bantuan kewangan tunai secara *one-off* sebanyak RM3,000. Pemberian GKP2.0 ini melibatkan peruntukan sebanyak RM600 juta yang akan memanfaatkan lebih 200 ribu peniaga mikro;
- ii. Kerajaan melalui Bank Negara Malaysia dan institusi-institusi kewangan telah melaksanakan moratorium lanjutan dan bantuan bank secara bersasar bagi golongan yang masih terjejas tertakluk kepada syarat dan kedudukan semasa individu yang memerlukannya. Pertimbangan turut diberikan kepada peminjam-peminjam lain, termasuk individu atau PKS, peniaga, penjaja atau mereka yang bekerja sendiri yang turut terkesan dengan COVID-19.



Semasa pembentangan Belanjawan 2021 pada 6 November lalu, Kementerian Kewangan turut mengumumkan pelbagai inisiatif tambahan bagi membantu golongan peniaga atau PKS mikro melalui pelbagai bantuan daripada aspek pembiayaan, peningkatan kapasiti dan peluang pasaran, antaranya seperti berikut:

**Pemeriksaan Golongan Usahawan Wanita**

- i. Pembiayaan mikro kredit khas kepada PKS wanita melalui TEKUN, MARA dan AgroBank berjumlah RM95 juta;
- ii. Pembiayaan Islam melalui program Ar-Rahnu BizNita di bawah Yayasan Pembangunan Ekonomi Islam Malaysia (YaPIEM) dengan dana sebanyak RM50 juta; dan
- iii. Program Pembangunan Perniagaan Usahawan Mikro atau BizMe kepada golongan usahawan wanita.

**Pemeriksaan Golongan Usahawan Bumiputera**

- i. Pembiayaan PKS Bumiputera melalui syarikat Jaminan Pembiayaan Perniagaan, SJPP dengan dana sebanyak RM2 bilion;
- ii. Program peningkatan kapasiti termasuk pembangunan profesional, Dana Kemakmuran Bumiputera serta program atau projek khusus untuk Bumiputera sebanyak RM1.3 bilion;
- iii. Program peningkatan keupayaan usahawan mikro dan PKS Bumiputera oleh Bank Pembangunan Malaysia Berhad dan SME dengan dana sebanyak RM800 juta; dan
- iv. Pembiayaan melalui TEKUN dan PUNB bagi PKS dan PKS mikro Bumiputera dengan dana sebanyak RM510 juta.

**Penggalakan Penghasilan dan Pembelian Produk Tempatan**

- i. Program latihan dan bantuan penjualan serta peralatan digital di bawah Kempen e-Dagang PKS dan PKS Mikro dengan peruntukan sebanyak RM150 juta;
- ii. Inisiatif *Shop Malaysia Online* dengan peruntukan sebanyak RM150 juta; dan

- iii. Program Pembangunan Francais Mikro dan Francais Mampu Milik serta program Beli Barangan Buatan Malaysia dengan peruntukan berjumlah RM25 juta.

### **Akses Kepada Pembiayaan Mikro**

Selain program pembiayaan yang telah saya nyatakan sebentar tadi, Kerajaan turut menyediakan akses kepada pembiayaan mikro melalui program berikut:

- i. Pembiayaan kredit mikro melalui TEKUN Nasional, Agrobank, BSN dan institusi kewangan lain dengan dana sebanyak RM1.2 bilion; dan
- ii. Platform Jana Niaga untuk pembayaran digital rantai bekalan melalui EXIM Bank dengan dana sebanyak RM300 juta.

Kerajaan juga menyediakan peruntukan sebanyak RM20 juta bagi Skim Pembangunan Usahawan Masyarakat India atau SPUMI, program pembiayaan perniagaan komuniti Cina melalui BSN dan program pembangunan usahawan bagi komuniti lain berjumlah RM5 juta disediakan.

Di bawah Belanjawan 2021, Kerajaan juga menyediakan GKP Khas bernilai RM1,000 untuk mereka yang terkesan di Sabah termasuk peniaga dan penjaja, pemandu teksi, e-hailing dan kereta sewa, serta pemandu pelancong. Dianggarkan 20,000 penerima akan memanfaatkan bantuan ini.

Kerajaan akan memastikan semua program yang sedang berlangsung dan yang akan bermula tahun 2021 akan dilaksanakan secara cekap dan berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : TUAN SIVAKUMAR VARATHARAJU**  
**NAIDU [ BATU GAJAH ]**  
**TARIKH : 16 NOVEMBER 2020 (ISNIN)**

**SOALAN**

Minta **MENTERI PENGAJIAN TINGGI** menyatakan pemantauan Kementerian terhadap IPTS yang terpaksa beroperasi dalam keadaan luar biasa akibat kekangan wabak COVID-19. Adakah Kementerian bercadang untuk mengadakan rundingan dengan pihak IPTS untuk menurunkan yuran pengajian kerana terdapat perubahan besar dalam norma pengajaran dan pembelajaran pada ketika ini.

**JAWAPAN**

**Tuan Yang di-Pertua,**

Kementerian amat prihatin dan memahami kesan yang dirasakan oleh pelajar dan Institusi Pendidikan Tinggi Swasta (IPTS) akibat pandemik COVID-19 yang melanda negara ketika ini. Sesi-sesi *engagement* bersama IPTS sentiasa dilaksanakan bagi mencari penyelesaian terbaik untuk membantu mereka meneruskan operasi dalam situasi yang mencabar ini di samping mengurangkan bebanan kos yang ditanggung pelajar.

Untuk makluman Ahli Yang berhormat, sungguhpun pelajar-pelajar tidak berada di kampus dan meneruskan sesi PdP mereka secara dalam talian. IPTS masih perlu menampung kos-kos tetap yang lain antaranya seperti penyelenggaraan dan sewaan bangunan; utiliti bagi pejabat pentadbiran; penyelenggaraan infrastruktur pembelajaran dalam talian; penambahbaikan kandungan modul dalam talian; pembayaran gaji

pekerja; dan lain-lain kos pengurusan. Keadaan ini akan memberikan kesan kepada operasi IPTS sekiranya mereka menurunkan yuran pengajian yang dikenakan kepada pelajar.

Dalam memastikan yuran yang dikenakan oleh IPTS tidak membebankan pelajar pula, kementerian telah melaksanakan usaha-usaha seperti berikut:

- i. Mengawal kenaikan yuran oleh IPTS melalui kuasa Ketua Pendaftar. Sebarang permohonan kenaikan yuran pengajian oleh IPTS perlu mendapat kelulusan daripada Ketua Pendaftar di Jabatan Pendidikan Tinggi (JPT) terlebih dahulu;
- ii. Memastikan IPTS mematuhi siling atau had yuran pengajian yang telah diluluskan serta syarat-syarat lain yang ditetapkan oleh Ketua Pendaftar di Jabatan Pendidikan Tinggi (JPT) dalam mana-mana kelulusan kursus pengajian; dan
- iii. Mengingatkan IPTS supaya mematuhi Akta Kawalan Harga dan Antipencatutan 2011 (Akta 723) bagi melindungi kepentingan pelajar supaya mereka tidak dibebani oleh caj perkhidmatan yang tinggi.

Kementerian akan sentiasa memantau situasi semasa yuran-yuran yang dikenakan oleh IPTS dan sebarang keputusan yang diambil adalah secara dengan izin *case by case basis*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN CHAN MING KAI [ALOR SETAR]**

**TARIKH : 16 NOVEMBER 2020 (ISNIN)**

**SOALAN**

**TUAN CHAN MING KAI [ ALOR SETAR ]** minta **MENTERI KEWANGAN** menyatakan jumlah pembiayaan perumahan yang telah diluluskan oleh setiap institusi-institusi kewangan masing-masing yang terlibat dalam Skim Jaminan Kredit Perumahan (SJKP) dan nyatakan bank apa yang membiayai peminjam yang paling ramai.

**JAWAPAN**

**Tuan Yang Dipertua,**

Untuk makluman Ahli Yang Berhormat, sejak Skim Jaminan Kredit Perumahan (SJKP) dilancarkan pada tahun 2008 sehingga 30 September 2020, sejumlah 8,805 akaun peminjam dengan jumlah pembiayaan perumahan sebanyak RM742,461,786.40 telah diluluskan oleh institusi-institusi kewangan yang mengambil bahagian. Keseluruhan pembiayaan perumahan ini dijamin oleh SJKP.

Bank Simpanan Nasional (BSN) merupakan pembiaya terbesar melibatkan 6,042 peminjam dengan jumlah pembiayaan diluluskan adalah sebanyak RM478,494,418.90 atau bersamaan 64.45 peratus. Perincian jumlah pembiayaan perumahan yang telah diluluskan oleh institusi-institusi kewangan yang mengambil bahagian dan dijamin oleh SJKP adalah seperti berikut:

Institusi Kewangan	Jumlah Akaun Diluluskan	Jumlah Pembiayaan Diluluskan (RM)	Peratus
Bank Simpanan Nasional	6,042	478,494,418.90	64.45
Bank Muamalat Malaysia Berhad	757	135,170,040.97	18.21
Bank Islam Malaysia Berhad	1,159	59,132,219.96	7.96
Bank Kerjasama Rakyat Malaysia Berhad	281	46,408,805.14	6.25
Agrobank Berhad	151	6,618,687.36	0.89
Alliance Islamic Bank Berhad	156	5,874,786.30	0.79
Hong Leong Bank Berhad	60	2,876,667.00	0.39
Alliance Bank Berhad	76	2,840,511.77	0.38
Malayan Banking Berhad	62	2,295,066.00	0.31
Hong Leong Islamic Bank Berhad	42	1,681,283.00	0.23
Affin Bank Berhad	14	878,442.00	0.12
Maybank Islamic Bank Berhad	5	190,858.00	0.03
<b>Jumlah</b>	<b>8,805</b>	<b>742,461,786.40</b>	<b>100.00</b>

**PEMBERITAHUAN PERTANYAAN DEWAN RAKYAT MALAYSIA  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SRI HAJI TAJUDDIN BIN ABDUL  
RAHMAN [PASIR SALAK]**

**TARIKH : 16 NOVEMBER 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan status Pembangunan Bandar Seberang Perak, Kampung Gajah.

**JAWAPAN**

**Tuan Yang di-Pertua,**

FELCRA Berhad Seberang Perak merupakan sebuah projek bersepadu kerajaan dengan matlamat membasmi kemiskinan dengan meningkatkan taraf hidup dan pendapatan peserta pembangunan projek pertanian serta penempatan bandar baru.

Di dalam usaha meningkatkan taraf pendidikan penduduk di Bandar Seberang Perak, projek ini telah dilengkapi dengan tiga (3) buah Sekolah Kebangsaan, tiga (3) buah Sekolah Agama Rakyat, satu (1) Sekolah Menengah, satu (1) Kolej Komuniti dan satu (1) Kolej FELCRA. Kemudahan ibadah juga disediakan dengan pembinaan sebuah masjid berkapasiti 2000 jemaah dan sepuluh (10) fasa penempatan dengan masing-masing mempunyai sebuah surau. Kemudahan asas yang lain termasuk sebuah Klinik Kesihatan, Pondok Polis dan institusi perbankan Agro Bank.

Generasi ke-2 atau anak-anak peserta disediakan lot rumah mampu milik berjumlah 1,050 unit. Bagi staf FELCRA Berhad disediakan sebuah kompleks pejabat dan perumahan staf.

Di dalam rangka menjadikan Bandar Seberang Perak sebagai sebuah pusat bandar baru yang berdaya maju, FELCRA Berhad sedang berusaha untuk menjalankan kerjasama dengan Pihak Berkuasa Tempatan bertujuan bagi menaiktaraf perkara-perkara seperti berikut;

- i) Penyusunan semula lokasi bagi binaan bangunan kedai di tempat yang lebih strategik dan tidak mencoroboh kawasan rizab saluran parit dan rizab jalan bagi mengelakkan kejadian banjir kilat terutama pada musim hujan
- ii) Penyelenggaraan Jalan utama dan bahu Jalan di sekeliling Bandar Seberang Perak
- iii) Menambah baik kemudahan tapak pembuangan sampah
- iv) Menambah bilangan lampu Jalan bagi Jalan-jalan disekitar Kawasan perumahan demi keselamatan penduduk
- v) Mewujudkan sebuah balai polis khusus di kawasan penempatan berikutan populasi penduduk yang mencecah kira-kira 12,000 orang demi menjaga keselamatan, mengurangkan kejadian jenayah dan menjamin keharmonian masyarakat.
- vi) Infrastruktur sukan dan riadah untuk pembangunan modal insan golongan belia yang memerlukan peruntukan penyelenggaraan dan penambahbaikan dari kementerian bagi kegunaan masyarakat setempat.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN SIVARASA RASIAH [SUNGAI BULOH]**

**TARIKH : 16 NOVEMBER 2020 (ISNIN)**

**SOALAN**

**TUAN SIVARASA RASIAH [ SUNGAI BULOH ]** minta **MENTERI KEWANGAN** menyatakan jumlah dana yang dibelanja untuk perolehan 'procurement' oleh Kerajaan sejak 1 Mac 2020 untuk pengurusan dan pembangunan dan juga pecahan untuk belanja yang dilakukan oleh rundingan terus, tender terhad dan tender terbuka. Adakah Kerajaan bercadang demi ketelusan proses perolehan untuk meletak semua maklumat dan dokumentasi semua peringkan perolehan atas talian untuk pemerhatian awam.

**JAWAPAN**

**Tuan Yang di-Pertua,**

**Untuk makluman Yang Berhormat,**

Perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:

- i. Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;
- ii. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
- iii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki
- iv. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
- v. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat

Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.

Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan.

Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI MAHDZIR BIN KHALID  
[ PADANG TERAP ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI SAINS, TEKNOLOGI DAN INOVASI** menyatakan sejauh manakah usaha pihak Kementerian untuk membangunkan ekonomi rakyat menerusi tranformasi teknologi digital berteraskan 'internet of things' (IoT) terutamanya yang bersifat setempat bagi melahirkan inovasi sistem rangkaian gig ekonomi tempatan di samping mewujudkan lebih banyak peluang pekerjaan dalam tempoh pasca COVID-19.

**JAWAPAN**

**Untuk makluman Ahli Yang Berhormat,**

Pandemik COVID-19 melanda dunia dan memberi kesan yang ketara di peringkat global termasuklah di Malaysia.

Jemaah Menteri pada 22 April 2020 telah bersetuju supaya Kementerian Sains, Teknologi dan Inovasi (MOSTI) bersama-sama Kementerian Komunikasi dan Multimedia Malaysia (KKMM) menerajui inisiatif ekonomi digital sebagai agenda nasional di bawah Pasukan Petugas Ekonomi Digital (*Digital Economy Task Force – DETF*).

Pasukan petugas DETF ini dianggotai oleh wakil pelbagai Kementerian dan agensi Kerajaan serta wakil industri termasuk Perusahaan Kecil dan Sederhana (PKS) bertujuan menyelaraskan pelaksanaan pelbagai inisiatif ekonomi digital bagi memacu pemulihan

ekonomi negara yang terjejas akibat wabak Covid-19 berpandukan teras utama di bawah Pelan Jana Semula Ekonomi Negara (PENJANA) yang diumumkan oleh YAB Perdana Menteri pada 5 Jun 2020.

15 aliran kerja (*workstream*) termasuk Ekonomi Gig (*Gig Economy*), platform teknologi (*technology platform*) serta syarikat pemula dan inovasi (*innovation and start-up*) dibentuk di bawah DETF bagi melaksanakan program berimpak tinggi hasil kerjasama pelbagai pihak termasuk industri.

Selain itu, DETF juga memantau inisiatif bagi menambah baik ekosistem ekonomi gig di Malaysia. Seramai 697 *freelancer* telah mengikuti latihan dan bimbingan untuk menceburi bidang ekonomi gig. Usaha juga digandakan untuk menarik lebih ramai pekerja gig berdaftar dengan PENJANAGig (<https://gig.perkeso.gov.my>) sebagai jaminan keselamatan sosial dan kebajikan pekerja.

Peranan DETF akan diambil alih oleh Majlis Ekonomi Digital dan 4IR Negara bermula Disember 2020 dengan penyerapan kesemua aliran kerja DETF dalam 6 kluster yang diwujudkan dalam struktur tadbir urus Majlis. Majlis ini akan memperkukuh inisiatif-inisiatif yang telah dimulakan oleh DETF dalam menyelaraskan pelaksanaan semua inisiatif bagi jangka masa sederhana dan panjang.

MOSTI telah diberi mandat untuk menerajui kluster Teknologi Baharu Muncul (*Emerging Technology*) di bawah Majlis Ekonomi Digital dan 4IR ini dan akan memastikan pelaksanaan inisiatif khusus di bawah kluster ini terutama dalam mengenal pasti teknologi dan dasar berkaitan bagi menyelesaikan isu-isu nasional dengan sasaran agar negara beralih daripada negara pengguna teknologi kepada negara pembangun dan pencipta teknologi. Tumpuan juga diberikan kepada penggunaan teknologi tempatan yang selari dengan hasrat untuk menjadikan Malaysia negara berteknologi tinggi.

**Tuan Yang Di-Pertua,**

Kementerian Sains, Teknologi dan Inovasi melalui agensi-agensinya telah membiayai pembangunan pelbagai teknologi untuk aplikasi sektor-sektor yang berbeza. Di antaranya termasuklah

penggunaan teknologi *Internet of Things*, robotik, automasi, *big data* dan kecerdasan buatan bagi membangunkan ekonomi rakyat. Malaysian Global Innovation & Creativity Centre (MaGIC), sebuah agensi dibawah MOSTI, telah melaksanakan beberapa program pembangunan *start-ups* berteraskan teknologi dan inovasi, memperkenalkan perubahan cara bekerja kepada sektor awam dan swasta (badan-badan kerajaan dan korporat) seperti *Design Thinking Workshop*, *Deep Tech Bootcamp* dan *Hackathon*. Untuk tahun 2020, pihak Kementerian bersama dengan agensi pelaksana seperti MaGIC, TPM, MIMOS, MTDC dan Futurise telah memperkenalkan *National Technology & Innovation Sandbox* (NTIS). Penubuhan NTIS adalah bertujuan menyelesaikan masalah yang dihadapi oleh Perusahaan Kecil dan Sederhana (PKS) / *startups* / usahawan teknologi tinggi akibat daripada penularan wabak Covid-19.

Melalui MaGIC juga, bengkel dan *Bootcamp* yang berfokuskan atau berteraskan industri dapat memberi platform kepada para *startups* yang berteknologi, bagi memperhalusi pengembangan idea menjadi prototaip yang berfungsi atau produk / perkhidmatan sedia dikomersialkan.

Manakala, Geran Padanan Impak Sosial (SIM) – PENJANA pula, sebanyak RM10 juta geran diperkenalkan bertujuan untuk menyokong Perusahaan Sosial (SE) tempatan dan perniagaan berimpak sosial untuk menyemai dan memajukan inisiatif dan program mereka. Geran SIM akan diagihkan melalui mekanisme padanan 1:1 dan disediakan dengan inisiatif pendanaan awam untuk pemohon yang berjaya.

Malaysian Debt Ventures (MDV) telah menyediakan kemudahan Bantuan Pendanaan Permulaan Teknologi (*Technology Start-ups Funding Relief Facility*, TSFRF) kepada syarikat pemula yang terkesan dengan keadaan pasaran dan ekonomi yang teruk dan gangguan pembiayaan yang timbul akibat wabak Covid-19. TSFRF bertujuan untuk memberikan sokongan aliran tunai segera dan disasarkan untuk syarikat pemula dan modal teroka (*venture capital*, VC) yang disokong oleh agensi Kerajaan untuk mengekalkan operasi perniagaan mereka.

MOSTI juga telah melancarkan rangkaian hackathon nasional yang disebut “MYHackathon” yang memberi peluang kepada semua inovator, jurutera perisian, pakar subjek termasuk daripada syarikat pemula (*start-up*) dan ekonomi gig untuk bersama-sama membuat penyelesaian digital

yang akan membantu meningkatkan penyampaian perkhidmatan awam utama kepada Rakyat.

Selain daripada itu, MOSTI sedang menyediakan beberapa kajian halatuju (*roadmap*) jangka masa panjang sebagai contoh dalam bidang elektrik dan elektronik - semikonduktor, *blockchain* dan kecerdasan buatan (AI) untuk menjadi pemangkin kepada pembangunan rantai nilai (*value chain*) ekonomi yang berpotensi menjana perkembangan industri dan pewujudan peluang pekerjaan baru dalam jangka masa panjang.

Langkah-langkah di atas dijangka akan memberikan kesan positif kepada kepada sistem rangkaian *gig* ekonomi tempatan di samping mewujudkan lebih banyak peluang pekerjaan dalam tempoh pasca COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**  
**DARIPADA : DATUK WILSON UGAK ANAK KUMBONG**  
**[ HULU RAJANG ]**  
**TARIKH : 16 NOVEMBER 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan:

- (a) status balai bomba di Pekan Belaga; dan
- (b) sekiranya pihak Kementerian bercadang untuk membina sebuah balai bomba di Penempatan Semula Sg. Asap, Belaga.



**JAWAPAN**

**Tuan Yang di-Pertua,**

**Jawapan (a)**

1. Untuk makluman Yang Berhormat, Projek Balai Bomba dan Penyelamat Belaga telah diluluskan dalam RMKe-11 *Rolling Plan* Pertama (RP1) Tahun 2016 dengan kos projek berjumlah RM 5.5 juta. Projek tersebut telah mula pembinaan pada 18 April 2019 dan dijangka siap pada 10 Januari 2021.

2. Status terkini kemajuan sebenar pembinaan adalah **92.80%** di tapak berbanding **93.00%** mengikut jadual. Pada masa kini, kawasan Belaga mendapat perlindungan kebakaran dari Pasukan Bomba Sukarela Pekan Belaga yang dilengkapi peralatan kebombaannya seperti pam angkut, hos, nozel dan baju kalis api dengan keahlian seramai 30 orang.

**Jawapan (b)**

1. Berhubung pembinaan balai bomba di kawasan Sungai Asap, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) telah membuat permohonan projek pembinaan balai bomba tersebut dalam RMKe-12 *Rolling Plan* Pertama (RP1) Tahun 2021. Walau bagaimanapun, permohonan ini adalah tertakluk kepada kelulusan Unit Perancang Ekonomi, Jabatan Perdana Menteri (UPE, JPM) dan Kementerian Kewangan (MOF). Kawasan Sungai Asap kini mendapat perlindungan kebakaran dari Pasukan Bomba Sukarela Uma Daro Liling dengan kekuatan 27 orang ahli dan sebuah kenderaan bomba sukarela Proton Arena yang dilengkapi dengan pam angkut bagi kerja-kerja pemadaman.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI PENDIDIKAN** menyatakan apakah sebab-sebab kelewatan penyempurnaan pembinaan baru Sekolah SJK(T) Sungai Reyla di tapak baru.

**JAWAPAN**

**Tuan Yang di-Pertua,**

Projek pembinaan Sekolah Jenis Kebangsaan Tamil (SJKT) Sungai Reyla, Sungai Siput, Perak yang dilaksanakan secara Reka dan Bina ini telah dikeluarkan Surat Setuju Terima (SST) pada 28 Mei 2014. Tarikh Milik Tapak adalah pada 28 Jun 2014 dan Tarikh Siap Asal adalah pada 26 Jun 2016. Bagaimanapun, projek ini telah diluluskan Lanjutan Tempoh Masa (EOT) sebanyak 204 hari menjadikan tarikh siap baharu projek adalah pada 18 Januari 2017. Namun begitu, sehingga ke tarikh tersebut projek ini tidak dapat disiapkan sepenuhnya.

Antara punca kelewatan penyiapan projek ini adalah disebabkan kegagalan kontraktor menyiapkan baki kerja seperti kerja bekalan elektrik, kerja-kerja penurapan jalan dan pematuhan syarat-syarat Kebenaran Merancang (KM) daripada Pihak Berkuasa Tempatan (PBT).

Kementerian Pendidikan Malaysia (KPM) sedang dalam proses penamatan kontrak dan seterusnya kontraktor penyiap akan dilantik. KPM komited untuk menyiapkan projek ini demi memenuhi keperluan pendidikan murid di kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN WILLIAM LEONG JEE KEEN  
[SELAYANG]**

**TARIKH : 16 NOVEMBER 2020 (ISNIN)**

**SOALAN**

**TUAN WILLIAM LEONG JEE KEEN [ SELAYANG ]** minta **MENTERI KEWANGAN** menyatakan sebab-sebab Kerajaan menyokong cadangan penggabungan UEM Sunrise-EcoWorld dan usaha menyelamatkan (*bailout*) EcoWorld.

**JAWAPAN**

**Tuan Yang di-Pertua,**

Cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.

Cadangan tersebut telah dikemukakan berdasarkan kepada manfaat komersil yang mampu diraih hasil daripada penggabungan tersebut. Cadangan penggabungan tersebut tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.

Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.

Sebarang keputusan yang berkaitan dengan cadangan penggabungan ini adalah bersifat komersil dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN PANG HOK LIONG [LABIS]**

**TARIKH : 16 NOVEMBER 2020 (ISNIN)**

**SOALAN**

**TUAN PANG HOK LIONG [ LABIS ]** minta **MENTERI KEWANGAN** menyatakan negara kita kini masuk gelombang ketiga wabak pandemik COVID-19, apakah Kerajaan bercadang untuk melanjutkan tempoh moratorium pinjaman supaya membolehkan individu dan perniagaan menyusun semula kewangan dan menstrukturkan pembiayaan semula pinjaman mereka.

**JAWAPAN**

**Tuan Yang di-Pertua,**

Pada mulanya, institusi kewangan telah memberikan moratorium automatik ke atas pinjaman bank selama 6 bulan kepada semua peminjam sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Selepas berakhirnya moratorium automatik pada bulan September lalu, bantuan terus diberikan secara lebih bersasar.

Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021. 98% atau lebih kurang 650,000 peminjam yang memohon untuk bantuan bersasar, samada dalam bentuk moratorium (penangguhan pembayaran), pengurangan ansuran

bulanan, penjadualan semua atau lain-lain, telah lulus dan kini mendapat bantuan bersasar antara 3 hingga 6 bulan tempohnya.

Selain itu, ekoran daripada gelombang ketiga COVID-19 baru-baru ini, Kerajaan telah mengumumkan dalam Belanjawan 2021 bahawa bantuan bayaran balik pinjaman bersasar akan terus ditambahbaik dan dilanjutkan. Golongan B40 yang juga merupakan penerima Bantuan Prihatin Rakyat dan perusahaan mikro dengan pinjaman berjumlah sehingga RM150,000, akan mendapat moratorium, dan boleh memilih antara penangguhan penuh 3 bulan atau membayar 50% ansuran selama 6 bulan, bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Golongan M40 yang terkesan COVID-19 juga akan dapat mengakses bantuan pelbagai, kini mereka hanya perlu membuat pengisytiharan sendiri. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

**Tuan Yang di-Pertua,**

Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 16 NOVEMBER 2020**

**SOALAN**

Minta **MENTERI PENDIDIKAN** menyatakan :-

- (a) jumlah sekolah terlibat jangkitan COVID-19 dan adakah Kementerian mempertimbangkan sistem persekolahan berselang seperti disarankan KRI, memandangkan keadaan fizikal sekolah menyukarkan penjarakkan sosial; dan
- (b) perancangan Kementerian menambah baik sistem pembelajaran dalam talian bagi persediaan, memandangkan vaksin COVID-19 masih belum diperolehi.

**JAWAPAN**

**Tuan Yang di-Pertua,**

**(a)** Untuk makluman Ahli Yang Berhormat, Kementerian Pendidikan Malaysia (KPM) sentiasa prihatin mengenai risiko penularan jangkitan COVID-19, khususnya dalam kalangan warga sekolah. Bagi memantau penularan kes COVID-19 semenjak sekolah dibuka semula secara berperingkat pada 24 Jun 2020, KPM telah menggerakkan Jawatankuasa Pengurusan Pembukaan Semula Sekolah (JPPSS) di peringkat Kementerian, Jabatan Pendidikan Negeri (JPN) dan Pejabat Pendidikan Daerah (PPD).



Berdasarkan laporan Jawatankuasa, sehingga 8 November 2020, sebanyak 605 buah sekolah di bawah KPM di seluruh negara merekodkan kes jangkitan COVID-19 melibatkan murid, guru atau warga sekolah. Daripada jumlah ini, sebanyak 461 buah sekolah ditutup disebabkan terdapat kes jangkitan COVID-19 dalam kalangan murid, guru atau warga sekolah. Manakala, 144 buah sekolah lagi adalah melibatkan kes jangkitan COVID-19 yang dikesan berlaku selepas sekolah ditutup kerana berada dalam kawasan zon merah atau pelaksanaan Perintah Kawalan Pergerakan Bersyarat (PKPB) bagi sesuatu kawasan. Rekod di dalam laporan pemantauan ini adalah untuk sekolah yang berdaftar dengan KPM dan tidak termasuk sekolah yang tidak berdaftar di bawah KPM.

Walaupun semua sekolah telah ditutup mulai 9 November 2020 yang lalu, pemantauan oleh Jawatankuasa masih diteruskan sehingga kini. Ini adalah untuk memastikan pemantauan terus dibuat kepada kes-kes jangkitan COVID-19 dalam kalangan warga sekolah yang berlaku selepas sekolah ditutup.

Berkaitan pertanyaan mengenai sistem persekolahan berselang, KPM ingin memaklumkan bahawa KPM telah memperkenalkan tiga model pengoperasian sekolah apabila sesi persekolahan dibuka semula secara berperingkat mulai bulan Jun yang lalu. Model pengoperasian sekolah yang dilaksanakan adalah Model Satu Sesi, Model Dua Sesi dan Model Penggiliran. Model Penggiliran dilaksanakan di sekolah yang tidak mempunyai ruang mencukupi bagi menempatkan semua murid setelah mengambil kira penjarakan sosial dan faktor keselamatan yang lain.

**(b)** KPM sentiasa berusaha untuk menyediakan akses pembelajaran kepada murid secara dalam talian dan luar talian mengikut kesesuaian guru dan murid. Pelbagai platform telah digunakan oleh KPM untuk meningkatkan kebolehcapaian (*accessibility*) murid, sama ada secara dalam talian (*online*) mahu pun di luar talian (*offline*) bagi memenuhi keperluan pembelajaran murid.

Bagi murid yang mengikuti PdP di rumah dan mempunyai peranti serta akses internet, KPM menyediakan kemudahan pembelajaran dalam talian melalui platform seperti berikut:

- i. Pelantar pembelajaran digital, iaitu Digital Education Learning Initiative Malaysia (DELIMa). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP, kuiz dan video permainan pembelajaran;
- ii. Koleksi video pendidikan melalui pelantar EduwebTV dan CikgooTube bagi perkongsian koleksi video daya usaha kreativiti guru untuk PdP; dan
- iii. Program dan aktiviti seperti kelas digital (*e-class*) untuk murid dan webinar bagi guru.

Sebagai usaha bagi meningkatkan kelancaran sesi pengajaran dan pembelajaran (PdP) di rumah, termasuk juga pembelajaran secara dalam talian, KPM telah mengambil inisiatif dengan menyediakan Manual Pengajaran dan Pembelajaran di Rumah (PdPR). Manual ini adalah sebagai panduan kepada guru dalam melaksanakan PdPR secara berstruktur dan terancang supaya murid dapat mengikuti pembelajaran di rumah secara optimum. Panduan PdPR ini meliputi pelbagai kaedah PdP yang dapat dilakukan dari rumah seperti dalam talian (*online*), luar talian (*offline*), *off-site*, menggunakan modul pembelajaran dan berasaskan projek.

**Untuk makluman Ahli Yang Berhormat,**

KPM sedang di peringkat akhir merangka strategi pelaksanaan yang komprehensif dalam memperkasa pendidikan digital negara. Ini termasuklah mengambilkira keperluan pemilikan peranti oleh murid dan juga akses internet di sekolah di seluruh negara. Perkara ini adalah antara butiran yang dinyatakan dalam Belanjawan 2021 yang telah dibentangkan pada 6 November 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : Y.B. TUAN LIM GUAN ENG [BAGAN]**

**TARIKH : 16 NOVEMBER 2020 (ISNIN)**

**SOALAN**

**TUAN LIM GUAN ENG [ BAGAN ]** minta **MENTERI KEWANGAN** menyatakan impak ke atas ekonomi negara akibat gelombang ketiga wabak COVID-19, dan mengapa moratorium pinjaman bank-bank (nilai terkini) tidak boleh dilanjutkan selama 6 bulan lagi agar 8 juta rakyat dan syarikat Malaysia dapat menyelamatkan perniagaan dan pekerjaan mereka.

**JAWAPAN**

**Tuan Yang di-Pertua,**

1. Pertumbuhan ekonomi Malaysia bagi keseluruhan tahun 2020 dijangka terjejas akibat pandemik COVID-19. Ini dapat dilihat melalui pertumbuhan Keluaran Dalam Negeri Kasar (KDNK) yang telah mencatat penguncupan sebanyak 6.4 peratus bagi tempoh sembilan bulan pertama 2020. Walau bagaimanapun, kegiatan ekonomi dijangka pulih secara beransur-ansur pada tempoh separuh kedua tahun 2020 di mana penguncupan KDNK pada suku ketiga telah berkurang kepada 2.7 peratus. Dari sudut suku-ke-suku yang disesuaikan mengikut musim (seasonally-adjusted basis), ekonomi Malaysia telah pulih semula sebanyak 18.2 peratus (S2 2020: -16.5 peratus). Perkembangan ini adalah susulan daripada kegiatan ekonomi yang telah dibuka kembali pada awal bulan Mei 2020 dan pelaksanaan beberapa pakej rangsangan ekonomi bernilai RM305 bilion bagi meningkatkan mutu perkhidmatan kesihatan dalam menangani krisis COVID-19, meringankan beban yang ditanggung oleh rakyat, membantu perniagaan dan memulihkan semula ekonomi negara.

**Tuan Yang di-Pertua,**

2. Bagi meringankan beban rakyat dan perniagaan dalam menghadapi kesan pandemik COVID-19, bantuan moratorium telah diberikan kepada semua peminjam selama 6 bulan bermula antara April dan September 2020. Bantuan moratorium bayaran balik pinjaman terus diberikan secara bersasar bermula 1 Oktober 2020 selepas tempoh moratorium secara keseluruhan berakhir. Bank-bank terus menawarkan pelanjutan moratorium dan bentuk fleksibiliti bayaran balik pinjaman lain kepada mereka yang benar-benar terjejas akibat COVID-19. Bantuan moratorium bersasar ini disediakan kepada mereka yang telah kehilangan pekerjaan atau pendapatan yang terjejas kepada individu, isi rumah dan PKS sehingga akhir 2020. Sekitar 650,000 peminjam telah memohon pelanjutan dan kira-kira 98% permohonan telah diluluskan. Sejumlah 40% daripada peminjam memohon mendapatkan pelanjutan moratorium manakala 60% memilih untuk menyambung semula bayaran

balik pinjaman tetapi dengan bayaran ansuran yang lebih rendah. Selain itu, sekitar 85% daripada peminjam telah menyambung semula bayaran balik pinjaman tanpa apa-apa bantuan pada bulan Oktober. Ini menunjukkan bahawa tidak semua peminjam memerlukan bantuan moratorium berkenaan.

3. Selain itu, ekoran daripada gelombang ketiga COVID-19 baru-baru ini, Kerajaan telah mengumumkan dalam Belanjawan 2021 supaya bantuan bayaran balik pinjaman bersasar akan terus dilanjutkan kepada golongan B40 yang merupakan penerima Bantuan Sara Hidup/Bantuan Prihatin Rakyat dan perusahaan mikro dengan pinjaman berjumlah sehingga RM150,000. Peminjam ini boleh sama ada menangguhkan bayaran balik pinjaman selama tiga bulan, atau mengurangkan bayaran ansuran bulanan mereka sebanyak 50% untuk enam bulan. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

4. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank-bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi golongan M40 yang memohon pengurangan ansuran mereka, bank-bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN SIM TZE TZIN [ BAYAN BARU ]**

**TARIKH : 16 NOVEMBER 2020 (ISNIN)**

**SOALAN**

**TUAN SIM TZE TZIN [ BAYAN BARU ]** minta **MENTERI KOMUNIKASI DAN MULTIMEDIA** menyatakan adakah Kementerian bersimpati dengan pelajar luar bandar seperti Veveonah yang menghadapi masalah kekurangan internet. Apakah Langkah-langkah yang akan dilaksanakan untuk mengatasi masalah tersebut.

**JAWAPAN**

**Tuan Yang di-Pertua,**

Untuk makluman Ahli Yang Berhormat, pihak Kementerian dengan kerjasama Suruhanjaya Komunikasi dan Multimedia Malaysia (SKMM) sentiasa memberikan tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi di seluruh negara terutamanya di kawasan luar bandar.

Kementerian sangat bersimpati dengan cabaran yang dihadapi oleh pelajar-pelajar di kawasan pedalaman seperti yang berlaku kepada Veveonah Mosibin. Bagi menangani isu yang dibangkitkan, pihak SKMM telah membuat tinjauan di Kampung Sapatalang di Pitas dan hasil tinjauan tersebut mendapati terdapat sebuah menara komunikasi yang memberikan liputan 2G dan 3G oleh syarikat penyedia perkhidmatan

seperti Maxis, Celcom dan DiGi yang berada dalam lingkungan 1.1 kilometer daripada kampung pelajar berkenaan.

Walaupun bagaimanapun, buat masa ini, Kampung Sapatalang tidak dapat menerima liputan jalur lebar mudah alih yang baik daripada menara sedia ada berikutan faktor geografi kawasan berkenaan yang berbukit bukau. Perkara ini telah dikaji oleh pihak SKMM bagi perancangan menara baharu yang sedang berjalan dan penaiktarafan kepada teknologi 4G di menara sedia ada.

Untuk makluman Ahli Yang Berhormat, pihak Telekom Malaysia (TM) pula telah menaiktaraf rangkaian gentian optik ke Pusat Internet Komuniti (PIK) Kampung Pinggan-Pinggau yang terletak berhampiran dengan Kampung Sapatalang dengan kelajuan sehingga 300Mbps. PIK ini dapat dimanfaatkan oleh penduduk setempat dan para pelajar seperti Veveonah untuk mengakses internet secara kolektif termasuk pembelajaran secara atas talian.

Selain itu, pihak SKMM juga sedang membina sebuah menara komunikasi baharu di Kampung Bilangau Kecil yang terletak berhampiran dengan Kampung Sapatalang dan dijangka siap menjelang suku kedua 2021.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN FONG KUI LUN [BUKIT BINTANG]**

**TARIKH : 16 NOVEMBER 2020 (ISNIN)**

**SOALAN**

**TUAN FONG KUI LUN [ BUKIT BINTANG ]** minta **MENTERI KEWANGAN** menyatakan berapa kerugian yang pihak bank tanggung berikutan pelaksanaan moratorium bayaran balik pinjaman yang berakhir 30 September 2020 dan bilangan peminjam yang diberikan lanjutan tempoh bagi meringankan bebanan kewangan mereka.

**JAWAPAN**

**Tuan Yang di-Pertua,**

1. Kerajaan telah memberikan moratorium automatik antara April hingga September 2020 ke atas pinjaman bank selama 6 bulan sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan.
2. Seperti yang telah diumumkan dalam laporan LAKSANA, nilai yang dianggarkan untuk moratorium 6-bulan berjumlah kira-kira RM100 bilion, dengan kira-kira RM35 bilion kepada PKS dan RM65 bilion kepada peminjam individu. Seramai 7.7 juta peminjam individu dan 243,000 PKS yang telah menikmati kemudahan ini.
3. Untuk program Moratorium Lanjutan dan Bantuan Bank Bersasar yang bermula Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:



- a. 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
- b. 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

**Tuan Yang di-Pertua,**

4. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHA KEE CHIN [ RASAH ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI PENDIDIKAN** menyatakan apakah status peruntukan RM50 juta masing-masing untuk penyelenggaraan bangunan sekolah SJKC dan SJKT, sepertimana yang telah diumumkan dalam Belanjawan 2020. Berapa jumlah yang telah disalurkan kepada sekolah-sekolah dan bilakah keseluruhan peruntukan ini akan disalurkan.

**JAWAPAN**

**Tuan Yang di-Pertua,**

Jumlah peruntukan untuk penyelenggaraan bangunan Sekolah Jenis Kebangsaan Cina (SJKC) dan Sekolah Jenis Kebangsaan Tamil (SJKT) bagi tahun 2020 adalah sebanyak RM100 juta. Sehingga 11 November 2020, Kementerian Pendidikan Malaysia telah menyalur sejumlah RM89.67 juta kepada sekolah jenis kebangsaan Cina (SJKC) dan sekolah jenis kebangsaan Tamil (SKJT). Daripada jumlah tersebut, sebanyak RM47.09 juta disalur kepada 367 buah SJKC dan RM42.58 telah disalur kepada 279 buah SJKT. Manakala baki peruntukan penyelenggaraan dijangka selesai disalur selewat-lewatnya pada 16 November 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI SAINS, TEKNOLOGI DAN INOVASI** menyatakan adakah Kementerian akan menaikkan amaun pegangan wang cagaran (*security deposit*) yang perlu dibayar oleh Lynas daripada US\$50 juta yang telah diterima setakat ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Lembaga Perlesenan Tenaga Atom (Lembaga) mengenakan syarat bayaran cagaran bagi lesen terhadap Lynas (Malaysia) Sdn Bhd mengikut peruntukan Seksyen 18 Akta 304.

Pada 12 April 2012, AELB telah mengemukakan permohonan mewujudkan akaun deposit (870110) dengan nama “Akaun Deposit Lynas & Cost Regulatory Recovery Fee” kepada Jabatan Akauntan Negara Malaysia. Kemudian pada 15 Januari 2013 AELB telah memohon untuk mengemaskini akaun “Deposit Lynas & Cost Regulatory Recovery Fee” bagi tujuan berikut:

- a. Sebagai *financial security* yang akan dipegang oleh Jabatan AELB. Akan ditolak keluar bagi menjelaskan pembayaran apa-apa perbelanjaan berkaitan syarat lesen yang dikeluarkan kepada

**NO. SOALAN : 44**

syarikat Lynas (M) Sdn Bhd dan sebagai menampung '*cost regulatory fee*' jika diperlukan;

- b. Sebagai *financial security* yang akan dipegang oleh jabatan AELB. Akan ditolak sekiranya berlaku kejadian kehilangan punca radioaktif.

Jumlah bayaran cagaran yang ditetapkan menerusi permohonan yang dibuat Lembaga adalah sebanyak USD 50 juta. Pada masa ini Lembaga tidak bercadang untuk menaikkan jumlah cagaran tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN TONY PUA KIAM WEE [DAMANSARA]**

**TARIKH : 16 NOVEMBER 2020 (ISNIN)**

**SOALAN**

**TUAN TONY PUA KIAM WEE [ DAMANSARA ]** minta **MENTERI KEWANGAN** menyatakan jumlah jaminan yang telah diberikan secara langsung dan tidak langsung oleh Kementerian Kewangan dan agensi Kerajaan, termasuk Bank Negara dalam program-program menghadapi ancaman COVID-19. Apakah nilai dan tahap penggunaan (take up rate) untuk setiap program jaminan ini.

**JAWAPAN**

**Tuan Yang di-Pertua,**

1. Untuk makluman Ahli Yang Berhormat, dalam rangka Kerajaan membantu perniagaan menghadapi ancaman Covid-19, Kerajaan telah menyediakan pelbagai program dan inisiatif bagi tujuan tersebut. Program dan inisiatif tersebut telah diumumkan dalam pakej-pakej rangsangan ekonomi PRIHATIN, PRIHATIN PKS Tambahan dan PENJANA.

2. Bagi membantu syarikat Perusahaan Kecil dan Sederhana (PKS), Kerajaan telah menyediakan Skim Jaminan Modal Kerja, Skim Jaminan Automasi dan Digital, Skim Jaminan Kerajaan – PRIHATIN dan Skim Pembiayaan Pelancongan PENJANA di bawah Syarikat Jaminan Pembiayaan Perniagaan (SJPP) sebagai agensi pelaksana.

3. Sehingga 30 September 2020, jumlah had bagi 4 skim jaminan tersebut adalah sebanyak RM26.5 bilion. Jumlah pembiayaan yang telah diluluskan oleh institusi-institusi kewangan yang mengambil bahagian adalah sebanyak RM25.46 bilion atau bersamaan 96.1% daripada keseluruhan had skim, manakala jumlah jaminan yang telah diluluskan pula adalah sebanyak RM18.84 bilion.

4. Selain daripada itu, Kerajaan juga turut menyediakan Skim Jaminan Kredit Perumahan di bawah pelaksanaan Syarikat Jaminan Kredit Perumahan Bhd (SJKP) bertujuan untuk menyediakan jaminan kepada institusi-institusi kewangan untuk membolehkan orang awam yang berkemampuan tetapi tidak mempunyai bukti atau dokumen pendapatan secara rasmi (penyata gaji) untuk mendapatkan pinjaman perumahan daripada institusi kewangan terpilih. Sehingga 30 September 2020, sejumlah 8,805 akaun peminjam dengan jumlah pembiayaan perumahan sebanyak RM742,461,786.40 telah diluluskan oleh institusi-institusi kewangan yang mengambil bahagian. Keseluruhan pembiayaan perumahan ini dijamin oleh SJKP.

5. Selain itu, Kerajaan turut menyediakan Skim Jaminan PRIHATIN Danajamin (SJPD) bernilai RM50 bilion yang bertujuan untuk menyediakan jaminan kewangan bagi membolehkan syarikat-syarikat yang berdaya maju dari segi kewangan untuk mendapatkan akses pembiayaan daripada pasaran. Sehingga 31 Oktober 2020, sebanyak 21 permohonan pembiayaan berjumlah RM1.03 bilion telah diluluskan oleh institusi-institusi kewangan yang mengambil bahagian di mana jaminan yang diluluskan oleh Kerajaan melalui Danajamin Nasional Berhad (Danajamin) adalah sebanyak RM773 juta.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TENGKU ZULPURI BIN RAJA PUJI  
[ RAUB ]**

**TARIKH : 16 NOVEMBER 2020 (ISNIN)**

**SOALAN**

**TENGKU ZULPURI BIN RAJA PUJI [ RAUB ]** minta **MENTERI KOMUNIKASI DAN MULTIMEDIA** menyatakan perancangan untuk mengaktif serta mengembangkan perkhidmatan jalur lebar di kawasan desa dan luar bandar sangat penting khususnya dalam bidang pendidikan "online" dalam keadaan perintah kawalan pergerakan atau dalam keadaan darurat:-

- a) berapa menara komunikasi jalur lebar yang telah dipasang di Parlimen Raub, nyatakan lokasi, kekuatan gelombang yang sedia ada dan rancangan penambahan menara Jalur Lebar ini di masa hadapan, nyatakan lokasi baru yang di cadangkan ; dan
- b) amnya juga di kawasan luar bandar seperti di Sabah dan Sarawak.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa berusaha dalam melaksanakan pelbagai inisiatif bagi meningkatkan liputan dan kualiti perkhidmatan jalur lebar di seluruh negara. Sejajar dengan inisiatif yang dilaksanakan, pembelajaran digital seterusnya dapat diperkasa dengan penaiktarafan kualiti perkhidmatan jalur lebar khususnya di kawasan bandar dan luar bandar.

Di Parlimen Raub, sehingga September 2020, sebanyak 29 menara komunikasi bagi penyediaan jalur lebar mudah alih telah siap beroperasi. Manakala, terdapat dua (2) menara komunikasi baharu yang masih dalam peringkat pelaksanaan bagi penyediaan perkhidmatan jalur lebar mudah alih 4G yang dijangka siap secara berperingkat bermula pada suku pertama tahun 2021.

Senarai lokasi menara komunikasi yang telah siap dan sedang dalam pelaksanaan di Parlimen Raub adalah seperti dalam jadual di bawah:

<b>Bil</b>	<b>Kawasan</b>	<b>Nama Lokasi</b>	<b>Status</b>
1	Batu Talam	Felda Tersang	Beroperasi
2	Batu Talam	Sempam Baru	Beroperasi
3	Dong	Kg Baru Sg Chalit	Beroperasi
4	Batu Talam	Kg Kela	Beroperasi
5	Dong	Kg. Jelu	Beroperasi
6	Tras	Kg Sg Chetang	Beroperasi
7	Batu Talam	Kg Serdang, Raub	Beroperasi
8	Batu Talam	Kg Temalir	Beroperasi
9	Tras	Bkt Fraser 2	Beroperasi
10	Batu Talam	Kg Batu Talam	Beroperasi
11	Dong	Kg Bukit Pampong	Beroperasi



<b>Bil</b>	<b>Kawasan</b>	<b>Nama Lokasi</b>	<b>Status</b>
12	Batu Talam	Kg Hulu Sungai	Beroperasi
13	Batu Talam	Pos Satak	Beroperasi
14	Dong	Kg Pamah Rawas	Beroperasi
15	Dong	Jln Lembah Klau-Bilut	Beroperasi
16	Tras	Kg Orang Asli Batu Balung	Beroperasi
17	Dong	Kg Orang Asli Ulu Yol	Beroperasi
18	Batu Talam	Kg Jenud	Beroperasi
19	Dong	Kg Temau	Beroperasi
20	Batu Talam	Kg Sengkela	Beroperasi
21	Batu Talam	Air Terjun Chamang	Beroperasi
22	Batu Talam	Kg Sungai Gapoi	Beroperasi
23	Dong	Tanah Aina (Kg Ajai)	Beroperasi
24	Batu Talam	Kampung Tanjung Aur	Beroperasi
25	Tras	Kampung Tok Machang (Jalan Lembah Klau - Sg Klau)	Beroperasi
26	Tras	Parit Stan	Beroperasi
27	Tras	Bukit Fraser	Beroperasi
28	Tras	Fraser Town	Beroperasi
29	Tras	Taman Pasdec	Beroperasi
30	Batu Talam	Taman Dato Tg Paris	Dalam Pelaksanaan
31	Batu Talam	Ulu Atok	Dalam Pelaksanaan

Selain itu, di bawah inisiatif pelan Jalinan Digital Negara (JENDELA), sebanyak 19 menara baharu telah dirancang dengan perkhidmatan 4G di sekitar kawasan Parlimen Raub. Ia dijangka akan siap secara berperingkat sehingga tahun 2022 dan perancangan lokasinya adalah seperti berikut:

Bil	Kawasan	Nama Lokasi
1	Tras	Air Terjun Jeriau, Bukit Fraser
2	Batu Talam	Kg Ulu Sungai
3	Batu Talam	Pos Satak
4	Batu Talam	Lata Lembik
5	Dong	Jalan Hulu Dong
6	Tras	Ulu Gali
7	Dong	Kg Tanjung Putus
8	Batu Talam	Kg Keledok
9	Dong	Kg Hulu Temau
10	Batu Talam	Kg Sia Hulu Sungai
11	Batu Talam	Kg Sungai Gaharu
12	Dong	Felda Krau 1
13	Dong	Sungai Ruan
14	Batu Talam	Kg. Ulu Arang
15	Batu Talam	Kg. Sejuk
16	Batu Talam	Kg. Orang Asli Semalin
17	Tras	Taman Amalina Perdana
18	Dong	Kg. Pintu Padang
19	Tras	Sang Lee Village

Bagi perkhidmatan komunikasi di negeri Sabah dan Sarawak, terdapat inisiatif di bawah pelan JENDELA di mana untuk negeri Sabah, terdapat penambahan sebanyak 425 menara baharu yang akan dibina dan penaiktarafan sebanyak 2,202 alat pemancar komunikasi di menara sedia ada dengan perkhidmatan 4G akan dilaksana.

Manakala, bagi negeri Sarawak pula, terdapat penambahan sebanyak 692 menara baharu dan penaiktarafan sebanyak 2,041 alat

pemancar komunikasi di menara sedia ada dengan perkhidmatan 4G yang akan dilaksanakan.

Selain dari itu, pembelajaran digital juga diadakan di Pusat Internet Komuniti (PIK) seperti *eKelas* dan *Jom Studi*. Menerusi program pembelajaran digital seperti ini, para pelajar yang terutamanya berada di kawasan luar bandar dan kurang mendapat liputan, mampu mendapat akses kepada kandungan pendidikan berkualiti yang selaras dengan sukatan pelajaran Malaysia di PIK.

Walaupun bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : TUAN STEVEN CHOONG SHIAU YOON**  
**[TEBRAU ]**  
**TARIKH : 16 NOVEMBER 2020 (ISNIN)**

**SOALAN**

Minta **MENTERI PENGAJIAN TINGGI** menyatakan apakah kaedah pemerkasaan yang diambil oleh KPT untuk mengintegrasikan elemen industri IR 4.0 dalam kurikulum supaya dapat melahirkan graduan yang berkualiti dan kompeten.

**JAWAPAN**

**Tuan Yang di-Pertua,**

Dalam mendepani cabaran untuk melahirkan graduan yang berkualiti dan kompeten di era Revolusi Industri 4.0, kementerian sentiasa memastikan program akademik yang ditawarkan adalah terkini, kalis masa depan dan mempunyai elemen-elemen pembelajaran abad ke-21. Antara inisiatif yang telah dan sedang dilaksanakan oleh kementerian adalah:

- i. Memperkenalkan Kurikulum Tersedia Masa Hadapan atau dengan izin Future Ready Curriculum (FRC). Kurikulum ini menjadikan program akademik lebih fleksibel bagi memenuhi landskap pendidikan yang sentiasa berubah dalam era IR4.0;
- ii. Memperkenalkan inisiatif 2u2i dan Work Based Learning (WBL) bagi membolehkan pelajar menjalani sesi

pembelajaran di industri dan mendapat pendedahan berkaitan elemen IR4.0 yang diguna pakai oleh industri; dan

- iii. Meningkatkan penglibatan panel daripada badan-badan profesional seperti Institute for Labour Market Information and Analysis (ILMIA); Malaysian Investment Development Authority (MIDA) dan Talentcorp dalam proses saringan bagi penawaran program-program akademik agar selaras dengan keperluan IR4.0.

Selain itu, kementerian melalui Jabatan Pendidikan Politeknik dan Kolej Komuniti (JPPKK) pula telah membangunkan Rangka Kerja TVET 4.0 sebagai kerangka untuk mengintegrasikan elemen IR4.0 dalam kurikulum. Rangka Kerja ini merangkumi 6 teras utama iaitu transformasi sistem pendidikan; penghasilan graduan TVET berkualiti; pengayaan bakat di dorong teknologi; memperkukuh kolaborasi industri dan komuniti; pemantapan governan yang responsif dan mampan; serta membudaya penyelidikan gunaan dan inovasi.

Antara inisiatif yang dirancang di bawah kerangka ini termasuklah meningkatkan mekanisme penyampaian dengan membawa masuk industri ke kampus (*industry education center*); memperkenalkan program *Work-based Learning* (WBL); memperbanyakkan penawaran kursus-kursus Pembelajaran Sepanjang Hayat (PSH); serta pembangunan set kemahiran bakat (*talent skills set*) yang berupaya memaksimumkan potensi sumber manusia sesuai dengan perubahan teknologi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN KHOO POAY TIONG [KOTA MELAKA]**

**TARIKH : 16 NOVEMBER 2020 (ISNIN)**

**SOALAN**

**TUAN KHOO POAY TIONG [ KOTA MELAKA ]** minta **MENTERI KEWANGAN** menyatakan:-

(a) berapa jumlah peminjam bank di Malaysia (individu dan bukan individu), termasuk berapakah daripada jumlah itu yang telah memohon atau dihubungi bank untuk lanjutan moratorium bersasar; dan

(b) apakah sebab-sebab utama permohonan pelanjutan moratorium ditolak oleh bank.

**JAWAPAN**

**Tuan Yang di-Pertua,**

1. Kerajaan telah memberikan moratorium ke atas pinjaman bank selama 6 bulan sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan tetapi lebih tersasar bagi memastikan hanya mereka yang benar-benar memerlukannya akan dibantu meskipun selepas moratorium secara keseluruhan berakhir.

2. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

- a) sejumlah 40% telah memohon pelanjutan moratorium. Mereka terdiri terutamanya daripada individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik; dan
- b) sejumlah 60% telah memilih pengurangan bayaran ansuran bulanan. Mereka terdiri terutamanya daripada peminjam yang pendapatannya telah berkurang.

3. Manakala kes permohonan yang tidak diluluskan adalah kecil sebanyak 2% dan sebab utama permohonan ditolak oleh bank ialah:

- a) Peminjam individu masih mempunyai pekerjaan dengan pendapatan pada tahap pertengahan hingga tinggi yang stabil, serta dengan isi rumah termasuk pasangan masing-masing tidak mengalami pengurangan pendapatan; dan
- b) Peminjam PKS yang memang menghadapi kesukaran kewangan walaupun sebelum penularan wabak COVID-19. Bagi peminjam seperti ini, pelanjutan moratorium bukan satu penyelesaian yang mampan dan bank telah merujuk mereka

kepada AKPK untuk mendapatkan bantuan bagi menyelesaikan masalah hutang mereka. AKPK telah menubuhkan “Meja Bantuan Perusahaan Mikro” bagi memberikan khidmat nasihat kewangan secara percuma dan membantu perusahaan mikro dalam permohonan mendapatkan bantuan bayaran balik pinjaman. Terdapat juga sebilangan kes PKS yang sedang melalui prosiding muflis atau pembubaran, atau telah didaftarkan di bawah Program Pengurusan Hutang anjuran AKPK. Bagi peminjam yang berdaftar di bawah Program Pengurusan Hutang oleh AKPK, mereka boleh berhubung dengan AKPK untuk memohon semakan semula bayaran balik pinjaman yang mencerminkan keadaan kewangan semasa mereka.

**Tuan Yang di-Pertua,**

4. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

5. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

Sekian, terima kasih.



PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 16 NOVEMBER 2020 (ISNIN)

**SOALAN**

TUAN OSCAR LING CHAI YEW [ SIBU ] minta MENTERI KEWANGAN menyatakan rancangan Kerajaan untuk memulihkan ekonomi negara terutamanya pada tahun 2021, dan nyatakan jumlah kekurangan pendapatan negara akibat COVID-19.

**JAWAPAN**

Tuan Yang di-Pertua,

1. Kerajaan telah bertindak proaktif dengan melaksanakan pelbagai pakej rangsangan ekonomi bernilai RM305 bilion bagi meningkatkan mutu perkhidmatan kesihatan dalam menangani krisis COVID-19, meringankan beban yang ditanggung oleh rakyat, membantu perniagaan dan memulihkan semula ekonomi negara.
2. Dalam menangani wabak COVID-19 dan memulihkan semula ekonomi Negara Kerajaan menggunakan pendekatan strategi 6R iaitu:
  - a. Pertama, **Ketegasan atau Resolve** dalam mengawal Covid-19 dengan melaksanakan Perintah Kawalan Pergerakan (PKP);
  - b. Kedua, **Ketahanan atau Resilient** melalui pakej Rangsangan ekonomi PRIHATIN dan PRIHATIN PKS Tambahan untuk meningkatkan mutu perkhidmatan kesihatan, kemampuan rakyat dan ekonomi;

- c. Ketiga, **Memulakan semula atau *Restart*** ekonomi secara teratur dan terkawal dengan mengamalkan prosedur operasi standard (SOP) yang ditetapkan;
- d. Keempat, **Pemulihan atau *Recovery*** ekonomi dengan memperkenalkan pakej ransangan Pelan Jana Semula Ekonomi (PENJANA);
- e. Kelima, **Memperkasa atau *Revitalize*** ekonomi secara menyeluruh melalui Belanjawan 2021; dan
- f. Keenam, **Menyusun semula atau *Reform*** struktur ekonomi untuk kita melangkah ke era kebiasaan baharu menerusi penyediaan Rancangan Malaysia Kedua Belas 2021–2025 atau RMKe-12.

**Tuan Yang di-Pertua,**

3. Fasa ke-5 dan ke-6 dalam strategi 6R ini akan memberi tumpuan dalam memulihkan pertumbuhan ekonomi pada 2021. Pengumuman Belanjawan 2021 yang telah dibentangkan pada 6 November 2020 lalu adalah strategi fasa ke-5 iaitu untuk Memperkasa (*Revitalise*) yang dirangka khusus bagi mencapai matlamat kesejahteraan rakyat, kelangsungan perniagaan dan ketahanan ekonomi. Pelbagai inisiatif dan strategi yang dirangka menunjukkan komitmen Kerajaan untuk merangsang pertumbuhan ekonomi pasca krisis COVID-19. Antara inisiatif dan strategi yang diambil termasuklah:

- a. Peruntukan bagi memerangi pandemik COVID-19 dan melindungi Kesihatan awam;
- b. Memelihara kebajikan golongan rentan seperti pemberian tunai *one-off* Bantuan Prihatin Rakyat (BPR), pengeluaran Akaun 1 Kumpulan Wang Simpanan Pekerja (KWSP) bagi golongan B40 serta bantuan moratorium secara bersasar bagi individu dan PKS;

- c. Menjana dan mengekalkan pekerjaan dengan menyediakan insentif PenjanaKerjaya, program peningkatan kemahiran dan latihan semula dan Program Subsidi Upah Bersasar;
- d. Menjamin kesejahteraan hidup rakyat dengan menyediakan inisiatif Jalinan Digital Negara, membina dan menaik taraf infrastruktur digital, Skim Cerdik (pemberian komputer), meningkatkan pemilikan rumah serta menyediakan kemudahan pengangkutan;
- e. Memacu pelaburan dalam sektor utama, penambahbaikan persekitaran perniagaan, inisiatif sains, teknologi dan inovasi, penggalakan penghasilan dan pembelian produk buatan tempatan serta kemudahan pembiayaan kredit mikro;
- f. Memperkukuh sektor tumpuan dengan memperkasa sektor pertanian, pembangunan sektor komoditi serta kelangsungan industri pelancongan;
- g. Memperkasa peranan GLC dan masyarakat sivil; dan
- h. Menjamin kelestarian sumber.

4. Pelan pemulihan ekonomi seterusnya ialah fasa ke-6 iaitu Menyusun Semula (*Reform*) yang merupakan pelan jangka masa panjang. Rancangan Malaysia Kedua Belas 2021–2025 atau RMKe-12 yang dijadualkan semula untuk dibentangkan pada awal tahun hadapan sedang dirangka dengan mengadakan libat urus bersama semua pihak berkepentingan bagi memastikan pertumbuhan berkualiti, inklusif dan mampan. RMKe-12 bermatlamat untuk membolehkan ekonomi dipulihkan sepenuhnya serta memastikan kesejahteraan rakyat dapat ditingkatkan dan kekayaan negara dapat dikongsi bersama. Kesemua usaha Kerajaan ini dijangka memberi kesan positif kepada pertumbuhan ekonomi negara pada 2020 dan pasca COVID-19.

**Ahli-ahli Yang Berhormat,**

5. Semasa pembentangan Belanjawan tahun lepas, Kerajaan telah mengumumkan unjuran jumlah hasil Kerajaan Persekutuan bagi 2020 sebanyak RM244.5 bilion. Namun, berdasarkan situasi semasa, anggaran hasil dijangka mengalami pengurangan berikutan unjuran Keluaran Dalam Negeri Kasar (KDNK) yang lebih rendah dan kejatuhan harga minyak mentah dunia. Selain itu, Kerajaan turut memperuntuk pertambahan perbelanjaan bagi melaksanakan pakej rangsangan dan pemulihan ekonomi susulan penularan pandemik COVID-19. Sehubungan itu, defisit fiskal pada tahun 2020 dijangka meningkat kepada 6% berbanding sasaran awal 3.2% daripada KDNK. Kerajaan juga akan menampung kekurangan pendapatan melalui sumber hasil *one-off* daripada dividen dan bayaran khas oleh syarikat Kerajaan, meneroka hasil cukai baharu, penjimatan subsidi minyak dan penstrukturan serta pengagihan semula perbelanjaan Kerajaan Persekutuan.

6. Bagi 2021 pula, hasil Kerajaan Persekutuan diunjur melonjak sebanyak 4.2% kepada RM236.9 bilion atau 15.1% daripada KDNK disokong oleh peningkatan pertumbuhan ekonomi dan prospek perniagaan. Peningkatan hasil sebahagian besarnya disumbangkan oleh kutipan hasil cukai yang lebih tinggi dengan anggaran peningkatan sebanyak 13.8% kepada RM174.4 bilion. Unjuran hasil tersebut akan dicapai melalui usaha Kerajaan mengukuh dan memaksimum kutipan hasil cukai dan meningkatkan keapungan cukai melalui inisiatif pembaharuan cukai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN TEO NIE CHING [ KULAI ]**

**TARIKH : 16 NOVEMBER 2020 (ISNIN)**

**SOALAN**

Minta **MENTERI PENDIDIKAN** menyatakan apakah status bantuan bayaran utiliti tambahan yang juga merangkumi pembentungan sebanyak RM12 juta kepada sekolah bantuan Kerajaan setakat ini.

**JAWAPAN**

**Tuan Yang di-Pertua,**

Jumlah peruntukan untuk bil utiliti sekolah bantuan kerajaan (SBK) bagi tahun 2020 adalah sebanyak RM56,415,600. Daripada jumlah ini, sebanyak RM44,415,600 adalah di bawah peruntukan Kementerian Pendidikan Malaysia (KPM). Manakala, RM12 juta lagi di bawah peruntukan khas yang diluluskan oleh Kementerian Kewangan semasa pembentangan Belanjawan 2020. Peruntukan khas ini bertujuan untuk pembiayaan utiliti, termasuk pembedungan bagi SBK.

Untuk makluman Ahli Yang Berhormat, peruntukan tersebut telah disalurkan secara berperingkat kepada SBK. Penyaluran peruntukan ini adalah dengan mengambil kira anggaran keperluan serta prestasi perbelanjaan bil utiliti dan pembedungan bagi sekolah berkenaan, tertakluk kepada bil sebenar dan tidak melebihi siling RM5,000 sebulan. Sehingga 1 November 2020, sebanyak RM41,582,100 telah disalurkan kepada Jabatan Pendidikan Negeri dan Bahagian terlibat untuk menampung keperluan bayaran bil utiliti dan pembedungan SBK.

KPM berharap dengan peruntukan yang disalurkan ini, pihak SBK akan dapat menyediakan persekitaran yang kondusif di sekolah untuk keselesaan murid dan warga sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN HAJI WAN HASSAN BIN MOHD RAMLI  
[DUNGUN]**

**TARIKH : 16 NOVEMBER 2020 (ISNIN)**

**SOALAN**

**TUAN HAJI WAN HASSAN BIN MOHD RAMLI [ DUNGUN ]** minta **MENTERI KEWANGAN** menyatakan langkah-langkah pemulihan khususnya nasib pekerja dalam industri penerbangan melibatkan syarikat penerbangan MAS dan AirAsia.

**JAWAPAN**

Tuan Yang di-Pertua,

Penularan wabak Covid-19 yang telah diisytiharkan sebagai pandemik oleh Pertubuhan Kesihatan Sedunia (World Health Organisation - WHO) pada 11 Mac 2020 bukan sahaja telah menyebabkan krisis kesihatan dan sosial malah krisis ekonomi di kebanyakan negara di dunia. Sebagai sebuah negara perdagangan kecil yang mengamalkan sistem ekonomi terbuka, Malaysia turut menerima kesan buruk akibat pandemik ini. Kesan ekonomi yang dialami ini bersifat menyeluruh dan dirasakan oleh semua sektor dalam negara termasuklah sektor penerbangan yang disebabkan oleh penutupan sempadan dan pelaksanaan perintah kawalan pergerakan bagi menangani penularan wabak COVID-19 tersebut.

Untuk makluman Ahli Dewan, Kerajaan komited membantu semua pihak yang terjejas dengan penularan wabak COVID-19 ini. Walau bagaimanapun, pada masa ini Kerajaan tidak terlibat dalam pelan menyelamatkan mana-mana syarikat termasuk syarikat penerbangan komersial memandangkan Kerajaan perlu memastikan apa-apa bantuan yang diberikan terutamanya daripada segi kewangan mempunyai kerangka kerja dan objektif yang jelas. Tambahan pula, Kerajaan tidak mempunyai sebarang pegangan saham dalam mana-mana syarikat penerbangan tersebut. Justeru itu, sebarang cadangan pemulihan kewangan syarikat adalah tertakluk kepada pertimbangan dan kelulusan Lembaga Pengarah dan pemegang saham syarikat masing-masing.

**Tuan Yang di-Pertua,**

Kerajaan juga melalui Belanjawan 2021 akan menyediakan program latihan dan penempatan semula bagi 8,000 kakitangan dari syarikat penerbangan di Malaysia dengan peruntukan sebanyak 50 juta ringgit. Inisiatif khusus ini adalah sebagai tambahan kepada bantuan yang telah dilaksanakan melalui program-program seperti PRIHATIN, PRIHATIN PKS+, PENJANA dan KITA PRIHATIN serta inisiatif-inisiatif lain yang diumumkan dalam Belanjawan 2021 bagi membantu pekerja dan rakyat yang terjejas pendapatan serta perniagaan yang mengalami masalah aliran tunai.

Sekian, terima kasih.



**MESYUARAT KETIGA, PENGGAL KETIGA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : TUAN ABDUL LATIFF BIN ABDUL RAHMAN  
[ KUALA KRAI ]**

**TARIKH : 16 NOVEMBER 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan bilakah projek Jambatan Pasir Kelang akan dimulakan dan apakah halangan yang menyebabkan kelewatan projek ini.

**JAWAPAN**

**Tuan Yang di-Pertua,**

Untuk makluman YB, Projek Membina Jambatan Antara Kg. Pasir Era Ke Kg. Pasir Kelang, Kuala Krai, Kelantan telah diiklankan oleh pihak JKR Malaysia pada 30 Jun 2020 dan sedang dalam proses penilaian tender. Jambatan yang akan dibina adalah sepanjang 400m dan disasarkan dapat disiapkan dalam tempoh 24 bulan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : TUAN HAJI WAN HASSAN BIN MOHD RAMLI  
[DUNGUN]**

**TARIKH : 16 NOVEMBER 2020 (ISNIN)**

**SOALAN**

**DATO' MOHD NIZAR BIN ZAKARIA [ PARIT ]** minta **MENTERI KEWANGAN** menyatakan masa depan industri penerbangan yang semakin suram akibat COVID-19 serta apakah perancangan Kerajaan dalam menangani kemelut dua syarikat penerbangan gergasi negara, Malaysia Airline Berhad (MAS) dan AirAsia Berhad berhadapan dengan risiko gulung tikar termasuk lambakan pemberhentian pekerja mereka.

**JAWAPAN**

**Tuan Yang di-Pertua,**

Penularan wabak Covid-19 yang telah diisytiharkan sebagai pandemik oleh Pertubuhan Kesihatan Sedunia (World Health Organisation - WHO) pada 11 Mac 2020 bukan sahaja telah menyebabkan krisis kesihatan dan sosial malah krisis ekonomi di kebanyakan negara di dunia. Sebagai sebuah negara perdagangan kecil yang mengamalkan sistem ekonomi terbuka, Malaysia turut menerima kesan buruk akibat pandemik ini. Kesan ekonomi yang dialami ini bersifat menyeluruh dan dirasakan oleh semua sektor dalam negara termasuklah sektor penerbangan yang disebabkan oleh penutupan sempadan dan pelaksanaan perintah kawalan pergerakan bagi menangani penularan wabak COVID-19 tersebut.

Untuk makluman Ahli Dewan, Kerajaan komited membantu semua pihak yang terjejas dengan penularan wabak COVID-19 ini. Walau bagaimanapun, pada masa ini Kerajaan tidak terlibat dalam pelan menyelamatkan mana-mana syarikat termasuk syarikat penerbangan komersial memandangkan Kerajaan perlu memastikan apa-apa bantuan yang diberikan terutamanya daripada segi kewangan mempunyai kerangka kerja dan objektif yang jelas. Tambahan pula, Kerajaan tidak mempunyai sebarang pegangan saham dalam mana-mana syarikat penerbangan tersebut. Justeru itu, sebarang cadangan pemulihan kewangan syarikat adalah tertakluk kepada pertimbangan dan kelulusan Lembaga Pengarah dan pemegang saham syarikat masing-masing.

**Tuan Yang di-Pertua,**

Mengambil kira kesan krisis ekonomi semasa yang menyeluruh, Kerajaan berpandangan pemberian bantuan wajar dilaksanakan secara meluas dan tidak terhad kepada syarikat penerbangan sahaja. Bantuan ini telah dilaksanakan oleh Kerajaan melalui beberapa pakej rangsangan dan pelan pemulihan ekonomi seperti PRIHATIN, PRIHATIN PKS+, PENJANA dan KITA PRIHATIN yang keseluruhannya bernilai RM305

bilion bagi membantu pekerja dan rakyat yang terjejas pendapatan serta perniagaan yang mengalami masalah aliran tunai termasuk syarikat penerbangan tempatan. Antara langkah yang telah dilaksanakan seperti yang diumumkan sebelum ini antaranya termasuklah moratorium bayaran balik pinjaman perniagaan dan pinjaman isi rumah, Bantuan Prihatin Nasional, program subsidi upah, skim pengeluaran i-Lestari, skim jaminan pembiayaan perniagaan, skim kredit mikro, dana pembiayaan PKS dan banyak lagi.

Bank Negara Malaysia (BNM) juga telah menurunkan Kadar Dasar Semalaman (OPR) dan Keperluan Rizab Berkanun (SRR) bagi meningkatkan mudah tunai untuk menyokong aktiviti pengantaraan kewangan. BNM turut menyatakan ketersediaan bantuan bayaran balik pinjaman bersasar kepada peminjam yang terjejas berikutan COVID-19. Kemudahan ini boleh dipohon terus kepada institusi kewangan komersial berkaitan merangkumi pelanjutan moratorium dan pengurangan bayaran ansuran.

Kerajaan juga melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan modal kerja syarikat. Kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

Kerajaan juga melalui Belanjawan 2021 akan menyediakan program latihan dan penempatan semula bagi 8,000 kakitangan dari syarikat penerbangan di Malaysia dengan peruntukan sebanyak 50 juta ringgit. Inisiatif khusus ini adalah sebagai tambahan kepada bantuan yang telah dilaksanakan melalui program-program seperti PRIHATIN, PRIHATIN PKS+, PENJANA dan KITA PRIHATIN serta inisiatif-inisiatif lain yang diumumkan dalam Belanjawan 2021 bagi membantu pekerja dan rakyat yang terjejas pendapatan serta perniagaan yang mengalami masalah aliran tunai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATUK SERI SHAMSUL ISKANDAR @ YUSRE  
BIN MOHD AKIN [HANG TUAH JAYA]**

**TARIKH : 16 NOVEMBER 2020 (ISNIN)**

**SOALAN**

**DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA]** minta **MENTERI KEWANGAN** menyatakan apakah langkah-langkah pencegahan segera untuk membendung masalah penipuan kewangan (*financial scam*) yang semakin berleluasa sejak kebelakangan ini.

**JAWAPAN**

**Tuan Yang di-Pertua,**

1. Untuk makluman Ahli Yang Berhormat, sejak kebelakangan ini, pelbagai jenis penipuan kewangan (*financial scam*) semakin berleluasa dalam kalangan rakyat yang menjurus kepada kesalahan di bawah seksyen 420 Kanun Keseksaan. Antaranya ialah penipuan dalam talian, skim cepat kaya, penipuan penawaran pinjaman bank, skim pelaburan dan sindiket Macau Scam yang tidak mempunyai sasaran mangsa yang tertentu. Secara khususnya bagi sindiket Macau Scam, sindiket ini akan membuat panggilan telefon secara rambang kepada bakal mangsanya dan beroperasi dengan cara menawarkan cabutan bertuah, penipuan kes penculikan untuk mendapatkan wang tebusan, penyamaran sebagai pegawai polis atau pegawai agensi Kerajaan, serta pegawai Bank Negara Malaysia (BNM) atau bank komersial. Taktik ini digunakan untuk memperdaya mangsa sehingga menyebabkan kerugian wang ringgit.

2. Dalam usaha membanteras jenayah tersebut, BNM bersama institusi-institusi kewangan telah mengadakan pelbagai kolaborasi strategik dengan beberapa agensi penguatkuasaan seperti Polis Diraja Malaysia, Kementerian Perdagangan Dalam Negeri dan Hal Ehwal Pengguna, Suruhanjaya Sekuriti Malaysia, Suruhanjaya Komunikasi dan Multimedia Malaysia serta CyberSecurity Malaysia untuk berkongsi pengetahuan mengenai taktik terkini penipuan kewangan, kempen kesedaran dan juga membantu tindakan penguatkuasaan termasuk penangkapan sindiket berkaitan.

3. BNM juga telah menjalinkan kerjasama dengan pelbagai persatuan pengguna, badan bukan Kerajaan (NGO) dan persatuan perniagaan serta perindustrian dalam menyampaikan maklumat secara terus kepada pengguna kewangan agar lebih berwaspada dengan sindiket penipuan kewangan. Pelbagai saluran telah digunakan untuk meningkatkan kesedaran orang ramai bagi mengelakkan diri daripada menjadi mangsa penipuan. Antaranya ialah:

- a. Peringatan kepada semua pengguna melalui laman sesawang BNM
  - i. Senarai Amaran Pengguna Kewangan; dan
  - ii. Senarai Amaran Penipuan Kewangan
- b. Media Massa
  - i. Saluran Televisyen; dan
  - ii. Saluran Radio
- c. Media Sosial
  - i. Media sosial rasmi BNM di Facebook, Instagram, Twitter dan Youtube; dan
  - ii. Laman Facebook “Amaran Scam” untuk mendapatkan maklumat terkini mengenai taktik penipuan dan cara melindungi diri daripada menjadi mangsa (<https://www.facebook.com/amaranpenipuan/>)

- d. Penghantaran short message service (SMS) melalui syarikat telekomunikasi, penerbitan Majalah RINGGIT, serta Program Jangkauan Kesedaran (Awareness Outreach Programmes) menerusi Karnival Kewangan.

4. BNM, institusi-institusi kewangan dan agensi-agensi penguatkuasaan juga telah menasihati orang ramai agar melakukan perkara-perkara berikut sekiranya berdepan dengan situasi penipuan kewangan:

- i. Sentiasa berwaspada dan tidak mudah terpedaya dengan muslihat atau tipu helah pihak-pihak tertentu;
- ii. Jangan sesekali panik dan mengikut arahan yang diberikan oleh pemanggil termasuk pemindahan wang kepada orang yang tidak dikenali, tanpa terlebih dahulu menghubungi pihak polis atau institusi kewangan terbabit;
- iii. Jangan hubungi semula nombor telefon yang diterima, sebaliknya dapatkan nombor telefon rasmi syarikat, organisasi atau institusi terbabit untuk pengesahan lanjut; dan
- iv. Jangan dedahkan nombor akaun bank, nombor kad ATM atau kad kredit anda kepada orang yang tidak dikenali.

5. Orang ramai juga dinasihatkan untuk menggunakan portal (<https://ccid.rmp.gov.my/semakmule/>) dan aplikasi Semak Mule yang dibangunkan oleh PDRM bagi membuat semakan sekiranya terdapat laporan polis ke atas akaun bank penerima sebelum melakukan transaksi atas talian atau menghubungi BNM TELELINK di talian 1-300-88-5465.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE-14**

**PERTANYAAN : LISAN**

**DARIPADA : DATO' SERI TIONG KING SING [ BINTULU ]**

**TARIKH : 16 NOVEMBER 2020 (ISNIN)**

**SOALAN**

**DATO' SERI TIONG KING SING [ BINTULU ]** minta **MENTERI KEWANGAN** menyatakan :-

- (a) apakah kemampuan bajet Kerajaan dalam menyelenggara bangunan-bangunan dan hartanah milik Kerajaan; dan
- (b) apakah langkah-langkah Kerajaan dalam memastikan bangunan-bangunan dan hartanah milik Kerajaan diselenggara dengan baik.



**JAWAPAN**

Tuan Yang di-Pertua,

Untuk makluman Yang Berhormat, sebahagian besar peruntukan penyelenggaraan yang disediakan oleh Kerajaan merangkumi pelbagai keperluan penyelenggaraan dan pembaikan, termasuk menyelenggara aset-aset Kerajaan seperti jalan raya, sekolah, hospital, kuarters Kerajaan dan rumah kos rendah di seluruh negara.

Peruntukan penyelenggaraan adalah merupakan salah satu komponen perbelanjaan yang dikategorikan sebagai perbelanjaan '*Locked-In*' di mana keutamaan perlu diberikan oleh Kerajaan untuk menyediakan peruntukan bagi tujuan ini. Di peringkat awal perancangan belanjawan tahunan, Kementerian Kewangan akan mengeluarkan garis panduan penyediaan anggaran perbelanjaan tahunan di mana salah satu perkara yang perlu dipatuhi oleh kementerian dan jabatan adalah untuk mengambil kira perbelanjaan '*Locked-In*' termasuklah perbelanjaan penyelenggaraan dalam cadangan anggaran perbelanjaan tahunan yang disediakan. Di peringkat pelaksanaan belanjawan pula, Kementerian Kewangan melalui Pekeliling Belanjawan Tahunan yang dikeluarkan antaranya mensyaratkan agar peruntukan penyelenggaraan tidak boleh dipindahkan ke butiran perbelanjaan yang lain, kecuali dengan mendapat kelulusan khas Kementerian Kewangan terlebih dahulu. Ini menunjukkan komitmen Kerajaan dalam mengutamakan aspek penyelenggaraan terutamanya yang melibatkan aset Kerajaan melalui dasar 3R iaitu Pembaikan, Penggantian dan Pemulihan (*Repair, Replace and Restore*). Sebagai maklumat tambahan, peruntukan perbelanjaan mengurus yang disediakan oleh Kerajaan bagi maksud membaiki dan menyelenggara aset awam adalah berjumlah RM10.1 bilion bagi tahun 2020, manakala untuk tahun 2021, peruntukan yang disediakan bagi maksud ini adalah berjumlah RM12.3 bilion.

Sekian, terima kasih.